


तपाश लोई दी



P. Jacobus
Secy.

04-9-2002



तपाश लोई दी

(डोगरी कविता संग्रह)

लेखक

पूर्णचंद बडगोत्रा

प्रकाशक

अपूर्वी प्रकाशन 7 न्यू प्लॉट जम्मू

TAPAASH LOI DI

Dogri Poems

By

Puran Chand Badgotra

सर्वाधिकार : लेखक

पैहला पुज्ज : 500

प्रकाशन ब'रा : 2002

मुद्रक : ग्लोबल इन्स्टीच्यूट आफ
इंफरमेशन टेक्नालोजी,
जम्मू।

मुल्य : 80 रूपे

आभार

इस कविता-संग्रह दे छापने आस्तै जम्मू कशमीर
कल्चरल अकैडमी कोला थोने आली आर्थिक
सहायता आस्तै लेखक धन्नवादी ऐ।

इस कविता संग्रह च व्यक्त बचारें कन्ने अकैडमी
दा सैहमत होना जरूरी नेई।



सुर्गवासी श्रीमती लक्ष्मी देवी

अपनी सुर्गवासी माता श्रीमती लक्ष्मी देवी अलमारुफ चाची जट्टी बड़गोत्रा (भलवालै आली) पत्नी सुर्गवासी श्री अमरनाथ जी. बड़गोत्रा हुन्दी सुच्ची सम्हालै च मेरी कवताएं दा ए पैहला प्रकाशन सादर समर्पत ऐ।

पूरण चन्द बड़गोत्रा

भूमिका

पूर्णचंद बडगोत्रा डोगरी साहित्य, खासकरी कविता च बड़ी चरोकी रुचि रखदे न । परमानंद अलमस्त ते होरनी डोगरी कविएं दे बोल गुनां दे होई इनें आपूं बी कविता रचना करना लाई ही। इंदी मुंढली कवतें दा संकलन 'तपाश लोई दी' सिरलेख कन्नै सामने आया ऐ । हेरे च धलोफां देइयै गै लोई दी आस बझदी ऐ। एह संग्रह १९८५ च औने कन्ने पूर्णचंद हुंदी आसैं गी इक सेध थोई गई ऐ ते डोगरी आंदोलन दे भागें इक नमां साधक जुड़ेआ ऐ । डोगरी भाशा गी उंदी इस पैहली भेंट दा सुआगत होना चाही दा। पूर्णचंद होर जेहड़े क इसलै सेवा निवृत्त जीवन जीया करदे न- डोगरी दे संजीदा सेवक सिद्ध होंगन, इसदी मेद ऐ ते उंदी कलम थमां अगें चिलयै मते पुख्ता कलाम दी मेद रखना बी वाजब बझोदा ऐ। "तपाश लोई दी" दिऐ कवतें च छंदोलंकार ते शैली दी गल्ल छोड़ी बी देचै तां बी इसदे भाव पक्ख ते विचार पक्ख च इन्नी समर्थ ऐ जे पढ़ने आहले गी झनकूरी देयै। भावें दी बनावट गी उच्चत शब्दें राहें प्रकट करियै कवि आश्वस्त करदा ऐ जे उस च बड़डा कवि बनने दे सारे तत्त मजूद न। सादी-सरल शैली ते सुबोध शब्दावली राहें जीवन दे यथार्थ गी प्रकट करने दी समर्थ कवि दी कलम इच मजूद ऐ।

कवि वर्तमान समें दे सच्च कोला कटोए दा नेई ऐ। ओ अज्जै दे समें दिऐ ललकारें प्रति सचेत ऐ। ओह समाज दी नबज गी पन्छानदा ऐ। इसदे व्यवहार प्रति कवि दी टिप्पणी बड़ी बनकदी सेही होंदी ऐ। 'दुमेल', 'शोखियां', धरतीमां ते 'खेढ' कवितां इक बक्खरी रंगत दियां

कवतां न। देश प्रेम ते इखलाक दा प्रचार बी इने कवते च नजरी औदा ऐ। प्रकृति चित्रण दिएं कवताएं च कवि गी चेची सफलता मिली दी ऐ। 'पतझड़ ते बसंत', रंग ते सुगंध' आदि कवतां सहाहने जोग न। गीते च बी कवि हिरदे दी बानगी प्रगट हुंदी ऐ।

पुर्णचंद होर डोगरी कवता दे सफर च संजीदगी कन्नै शामिल होई गेदे न। उंदियां औने आलियां पुस्तकां होर बी जोरदार ते बा-मतलब होंगन- इसदी पूरी मेद ऐ। डोगरी भाशा गी समरिद्ध बनाने दे जगै च "तपाश लोई दी" दे रूपै च दिती दी उंदी औहत दा मता-मता सुआगत।

शुभकामनां!

21 मार्च 2002

ओम गोस्वामी

181 मल्ला पहाड़ियां

जम्मू

मेरी नज़र च

श्री पूर्णचन्द बड़गोत्रा दी रचना— 'तपाश लोई दी' डोगरी—
काव्यसाहित्य दे बगीचे च इक रंग—बरंगे फुल्ले ने सज्जे दे
गुलदस्ते आहला लेखा आई रली ऐ।

इस कवता संग्रह च 41 कवतां, त्रै गीत तेबारां कुंडलियां—पद
न। कवि ने अपनिये कवते च नेके विशे गी समोए दा ऐ जिंदे च
किश नेह बी ऐहन जिंदे बारे च अस आम तौरे पर उपेक्षा भाव गैऽ
रखने आं इस थमां साबत होंदा ऐ जे कवि अपने परिवेश कन्ने
मती गैहराई कन्ने जुड़ेदा ऐ। तां गे उसदी पैन्नी नज़र अपने
परिवेश दी हर समस्या, हर चाल—हरकत भी पन्छानदी ते परखदी
ऐ ते उस कन्ने जिसलै उसदी संवेदना हरकत च औंदी ऐ तां
उसदी कवता आप मुहारी उछली पौंदी ऐ।

कवि ने नेके विशे उप्पर अपनी कलम दा प्रयोग करियै एह
सवत करी दित्ते दा ऐ जे जित्थे उसदे भाव समुंदरे दिये लैहरे
आहला लेखा ठाठां मारदे न उत्थे उसदी कल्पना शक्ति बी
उच्चियां डुआरिआं भरियै अपने चमत्कार दसदी ऐ।

इन्हें कवते च केइये दे विशेवस्तु मनो विज्ञान कन्ने
सर'बन्धत न, केइये दे समाज कन्ने, केइये दे परोआर—नियोजन
कन्ने, केइये दे पर्यावरण कन्ने ते केइये दा सर'बन्ध देशभक्ति
कन्ने ऐ। संग्रह च केई नेहइयां कवतां बी न जेहड़ियां कवि द्वारा

भोगे गेदे यथार्थ कन्नै प्राप्त होऐ दे कौड़े-मिट्ठे अनुभवे
 दी बड़ी सोहगी तर्जमानी करदियां न। एह ठीक ऐ जे कुतै-कुतै
 छंद-पूर्ति दी कमी दी बजाह कन्नै काव्य-प्रवाह च रुकावट
 अखरन लगदी ऐ पर सर'वन्धत कवता दा कथ्य सचाई दी घसौटी
 परा खरा उतरियै जिसलै कवि दे संवेदन-शील हिरदे थमां उपजेदे
 भावे दी सेही तर्जमानी करदा ऐ तां म्हाकवि कालिदास दे इन्हें
 शब्दे- "एकोहि दोषो गुण सन्निपाते निमज्जतीन्दोः किरणेष्विवाङ्क"
 (गुणें दे समूह च इक दोश इयां छप्पी जंदा ऐ जियां चन्दरमें दियें
 किरणें च उस दा इक काला नशान) दे मताबक कुतै-कुतै छन्दों
 भङ्ग दोश खपी मिटी जंदा ऐ।

'इक सलाह' कवता च कवि माहनू गी संभलियै चलने दी
 सलाह दिंदा होआ आखदा ऐ जे वर्तमान समें च माहनू उग्रवाद
 कोला मता गै गस्त ऐ जिसदी वजाह कन्नै गल्ली कुसै दी होने पर
 बी सजाऽ दा शकार कोई बे-गुनाह गै होई जंदा ऐ। इयां बी
 दिखने च औंदा ऐ जे औसत माहनू अपनियां गल्लियां दुऐं उप्पर
 थोपियै अपना लड़ छडकाने दी कोशिश करदा ऐ-

चरजै दी गल्ल ऐ, तां माहनू दुआस,

अन-होनियें, अज्ज साजे दे साज।

मनुक्खता जखो ऐ दी, इट्टें-बट्टें नै,

सिदक लोप होऐ तमें दी शट्टें नै।

बचाएओ, मनुक्खता गी होऐ निं घाल,

सोचें दी अपनी, रक्खेओ संभाल।।

परोआर नियोजन दे बारे च कवि दी किन्नी व्यवहारक सोच
 ऐ? 'सीमत परोआर' शीर्षक कवता दियें इन्हें पंक्तियें च दिक्खने
 जोग ऐ-

—“मते न्याणे औंदन थोड़ी,
 पूरी मूल निं पौंदी ऐ।
 समें ने साथ नमाना कियां?
 समझा गल्ल निं औंदी ऐ?
 लैनदारें दा सबर त्रुष्टा,
 आई बराजे बेड़े च।
 ठैंटर पाल, भुक्ख—भांगड़े,
 फसेआ कच्चै गेडै च॥
 जाम होई गेई जीवन गड्डी,
 बनेआ भारा गड्ढा ऐ।
 सुख लौके परोआरे दा,
 पछता दे जिंदा बड्ढा ऐ”

कवि दा विश्वास ऐ जे बच्चे साहबे दे ते सीमत होन तां ओह
 साढ़े देसै दी जन जीवन— फुलवाड़ी दे रंग—बरंगे फुल्ल बी ऐहन
 ते साढ़े देसै दा अनमोल खजाना बी ते भबिख दे बारस बी। ‘बच्चे
 कवता— दियें इन्हें पंक्तियें च कवि दे भाव किन्ने सुच्चे न—

—जीवन दी फुलवाड़ी दे—

फुल्ल एह रंग—बरंगे।

बारस अपने देसै दे

मस्ती दे रंग—रंगे।

चंगे—मंदे भेत कोई निं,

हर कोई इंदा जार।,

इक्क—इक्क मुस्कानै चा,

डुल्लै बे—संमम प्यार।

द्वढ़ न इंदे निश्चे बी,

अपनी धुनै दे पक्के ।
देसा दा अनमोल खजाना,
प्यारे—प्यारे बच्चे ।।

कवि बड़गोत्रा ने इन्हें कवितें च आम बरतोने आहली सरल
डोगरी भाशा दा प्रयोग कित्ते दा ऐ । जरूरत मताबक प्रसिद्ध
अलंकारे दा प्रयोग बी सराहने जोग ऐ ।

अस मेद करने आं जे कवि पूर्णचन्द बड़गोत्रा होर अपना
कार्य कर्म अगगैं बी जारी रखडन तां जे उंदियें रचने कन्नै डोगरी
काव्य—साहित्य दा भंडार ब'ददा र'वै ।

शुभकामनां कन्नै,

डा० सत्यपालश्रीवत्स

47/5 रूपनगर, जम्मू ।

—“मते न्याणे औंदन थोड़ी,
 पूरी मूल निं पौंदी ऐ।
 समें ने साथ नमाना कियां?
 समझा गल्ल निं औंदी ऐ?
 लैनदारें दा सबर त्रुट्टा,
 आई बराजे बेड़े च।
 ठैंटर पाल, भुक्ख-भांगड़े,
 फसेआ कच्चै गोड़ै च॥
 जाम होई गोई जीवन गड्डी,
 बनेआ भारा गड्डा ऐ।
 सुख लौके परोआरे दा,
 पछता दे जिंदा बड्डा ऐ”

कवि दा विश्वास ऐ जे बच्चे साहबे दे ते सीमत होन तां ओह
 साढ़े देसै दी जन जीवन— फुलवाड़ी दे रंग—बरंगे फुल्ल बी ऐहन
 ते साढ़े देसै दा अनमोल खजाना बी ते भबिख दे बारस बी। ‘बच्चे’
 कवता— दियें इन्हें पंक्तियें च कवि दे भाव किन्ने सुच्चे न—

—जीवन दी फुलवाड़ी दे—

फुल्ल एह रंग—बरंगे।

बारस अपने देसै दे

मस्ती दे रंग—रंगे।

चंगे—मंदे भेत कोई निं,

हर कोई इंदा जार।,

इक्क—इक्क मुस्कानै चा,

डुल्लै बे—संमम प्यार।

द्वढ़ न इंदे निश्चे बी,

अपनी धुनै दे पक्के ।
देसा दा अनमोल खजाना,
प्यारे-प्यारे बच्चे ।।

कवि बड़गोत्रा ने इन्हें कवतें च आम बरतोने आहली सरल
डोगरी भाशा दा प्रयोग कित्ते दा ऐ। जरूरत मताबक प्रसिद्ध
अलंकारे दा प्रयोग बी सराहने जोग ऐ।

अस मेद करने आं जे कवि पूर्णचन्द बड़गोत्रा होर अपना
कार्य कर्म अगर्गे बी जारी रखडन तां जे उंदियें रचने कन्नै डोगरी
काव्य-साहित्य दा भंडार ब'ददा र'वै।

शुभकामनां कन्नै,

डा० सत्यपालश्रीवत्स

47/5 रूपनगर, जम्मू।

अपने पास्सेआ

1969 दा ब'रा जित्थै डोगरी भाशा ते इस भाशा दे बोलने आलें आस्तै खुशियां लेइयै आया हा उत्थै गै मेरे आस्तै ए ब'रा इक बरदान साबत होआ हा। इक पासै तां साहित्य अकादमी द्वारा डोगरी भाशा गी मानता प्राप्त होई ते दुए पासै डोगरी भाशा दी शिरोमणि प्रीक्षा दा श्री गणेश होआ। शिरोमणि प्रीक्षा दा इक विद्यार्थी होने दे नातै मेरे पर डोगरी दे मते सारे कबिये दा प्रभाव तां पेआ गै हा पर स्व० श्री परमानंद "अलमस्त" होरें तां मेरे अंदरै दे कवियै गी जगाई दित्ता ते इत्थुआं गै मेरे मनै चा कविता दी सीर फुट्टी पेई ही। ते तदुएं शा गै में कवतां लिखना रम्भ कीता। पदमश्री श्री राम नाथ जी शास्त्री ते स्व० पंडित राम लाल शर्मा जी दे पास्ये बी बड़ा गै परोत्साहन थोआ।

अपने आले-दुआले दे समाजक, प्राकृतक, प्रगतीशील, भौतिक, मानसक, देश-प्यार, अध्यात्मक ते भाई चारे दे बाताबरण कशा प्रभावत होइयै अपने अनुभवें दा चित्रण में अपनी कवताएं च कीता दा ऐ जिस्सी तुंदी सेवा इच भेंट करै नां। मेद ऐ जे मेरा ए प्रयास तुसेंगी पसंद औंग ते मी तुंदे सुझाएं दी निहालप बी रौहगा।

पूर्णचंद बड़गोत्रा

ढ्योरा

1.	कात्री	1-3
2.	रीस	4-5
3.	रीझ ते छपैल	6
4.	सांझ ते बंड	7-9
5.	खेढ	10-11
6.	बत्तां ते मंजल	12
7.	दुमेल	13-14
8.	शोखियां	15
9.	घर-कुहाडू	16
10.	गल्लां	17-18
11.	उपकार	19-20
12.	पागल हिरखी	20
13.	इक्क-सलाह्	21-22
14.	बे-बसी	23-24
15.	धोखे	25-26
16.	भ्राऽ-भ्राऽ	27-28
17.	मेरे साथी	29-30
18.	सीमत परोआर	31-34
19.	दाज	35-37
20.	गलिया दा चन्न	38-39
21.	सुखना	40-41
22.	बच्चे	42-43
23.	बचपन, जुआत्री ते बुढ़ापा	44-46
24.	पिंड-ग्रां	47-48
25.	टुरना गै जीन ऐ	40
26.	मेरा भारत	50

27.	भाई चारा	51-52
28.	कौमी एकता	53-54
29.	गणतंत्रता	55-56
30.	धरती मां	57-59
31.	चन्न-तारे ते प्रेमी	60-61
32.	बदलोदियां रुत्तां	62
33.	ब्हार-शंगार	63-64
34.	बसंत	65-66
35.	सौन	67-69
36.	सब्ज क्रांती	70-71
37.	पत-झड़ ते बसंत	72-74
38.	लुटेरे	75-76
39.	रंग ते सुगंध	77-79
40.	गीत	80-83
41.	कुंडलियां	84-86
42.	न्होरा	87
43.	झगड़ा	88

कात्री

कात्री ते भाएं काही दी ऐ,
सारी दुनिया पर छाई दी ऐ।
कुतै कोमल हथें थ'म्मी दी,
कुसै बोझे नै लटकाई दी ऐ।
देव-वाणी इस दा फरमान,
सीस नुआ तां कुल्ल जहान।
त्रुटन लोहे दियां जंजीरां,
इदियां बन्नी लैन लकीरां।
रत्ती भर 'परा' ऐ,
जिस तोफें पर धाक जमाई दी ऐ।
कात्री ते भाएं काही दी ऐ,
सारी दुनिया पर छाई दी ऐ।
कुतै कोमल हथें थ'म्मी दी,
कुसै बोझे नै लडकाई दी ऐ।
है भाएं काही दी कात्री,
पर सैहन करै निं मन-मानी।
सच्च-सच्च इतिहास सुनांदी,
ना डरदी, झकदी, शरमांदी।
मर्यादा मनुक्ख समाजै दी,
इस्सै नै लिखी-लखाई दी ऐ।
कात्री ते भाएं काही दी ऐ,
सारी दुनिया पर छाई दी ऐ।

कुतै कोमल हत्ये थ'म्मी दी,
 कुसै बोझे नै लटकाई दी ऐ।
 थक्की नेई जुगें शा लिखदी,
 ए जीने दी बत्त सुझांदी।
 कृष्ण मुरार के आखी गेदे,
 गीता गी लिखिए समझांदी।
 ए प्रतिनिधि बचारे दी,
 जीहबै नै सार मलाई दी ऐ।
 कात्री ते भाएं काही दी ऐ,
 सारी दुनिया पर छाई दी ऐ।
 कुतै कोमल हत्ये थ'म्मी दी,
 कुसै बोझे नै लटकाई दी ऐ।
 बुद्धि-जीविये दे मनै इच,
 पांदी उच्चा थाहर।
 सच्ची साथी लेखक दी,
 जन-जीवन दा आकार
 अमृत ते अग बरहांदी ऐ,
 बिंद स्याही नै छूहनी चाही दी ऐ।
 कात्री ते भाएं काही दी ऐ,
 सारी दुनिया पर।
 कुतै कोमल हत्ये थ'म्मी दी,
 कुसै बोझे नै लटकाई दी ऐ।
 सुन्ने मढ़ी, मोतिये जड़ी,
 पूजै दा संसार।
 ए रूप सरसुती माता दा,
 ए सबने दी तारन हार।
 बद-सीस कुतै निं लगी जा,

निरपक्ष चलानी चाही दी ऐ।
कान्नी ते भाएं काही दी ऐ,
सारी दुनिया पर छाई दी ऐ।
कुतै कोमल हत्थें थ'म्मी दी,
कुसै बोझै नै लटकाई दी ऐ।



रीस

ए जोश नराला गरमी दा,
तां रत्त बुआले खंदी ऐ।
माहनू पर भुल्लन हारा ऐ,
कुदरत निं धोखा खंदी ऐ।
मंद-मंद ए पौन तां दिक्खो,
बिच्च मस्ती दे चलदी।
पर गरमी दे जोशै अंदर,
ए बी झक्खड़ बनदी।
क्रांति दे फी चिट्टे-काले,
डिगल छान चक्खै।
प्रल्यकारी युबके दा टोला,
बे-संभ कौतक दस्सै।
अंबरै इच न चिट्टे-काले,
डिगल गड़-गड़ गजदे।
जां धरती पर जुद्धै दे न,
ढोल-नगोड़े बजदे।
दिखदे-दिखदे शुरू लड़ाई,
टप-टप बरदा नीर।
मार-काट करै दे जियां,
रण-भूमि रणबीर।
तीर कमान ते भल्लां,
कदे ब्रह्मस्त्र बी चलदे।

धरती आले ऐंटम बम्ब,
 चलाने शा निं टलदे।
 ए प्रभु दी खेढ रचाई,
 तां गै खेढी जंदी ऐ।
 माहनु पर भुल्लन हारा ऐ,
 कुदरत निं धोखा खंदी ऐ।
 रत्त बगै जां नीर ब'रै,
 इक चैन मनै गी थोंदा ऐ,
 जित्ते दा खुशी मनांदा ऐ,
 हारे दा खैर मनांदा ऐ।
 जां बांदी रूत्त ऐ ब्हारै दी,
 मनै च चैन समाए दा।
 जित्तै दी खुशिया नै,
 बीरै दा मन भरमाए दा।
 नच्चन-कुद्दन गासा इच,
 बदलू चिट्टे ते काले।
 जुद्धवीर धरती पर जियां,
 बच्चन साजें दे तालै।
 फुल्ल बरहाए मेघराज बी,
 खुशिये इच भरमाए दे।
 मान थोए बीरै गी,
 जिनें बैरी दे मन कंबाए दे।
 केई जुगे शा इस्सै चाली,
 माहनू रीस करा दा।
 कुदरत दे पद-चित्रे पर गै,
 ए बी पैर धरा दा।
 गुरू महान ए दुनिया गी,
 पाठ पढ़ांदी जंदी ऐ।
 मानु पर भुल्लनहारा ऐ,
 कुदरत निं धोखा खंदी ऐ।

रीझ ते छपैल
 किन्नी क् चिर छपैलने,
 मना दे न सल्ल।
 रिसना लगे न जोरिया,
 फाड़ियै ए खल्ल।
 बंदी बने दखावे दे,
 सोचें जां दित्ती हार।
 धीयें फसाई औगली,
 करै दे न लंगार।
 खौरे न पाला दे,
 रीझां मनै कोई।
 दिक्खी लंगार सीदे,
 सराहग उन्नै कोई।
 पौंदे जे सीना आपूं,
 तां करने बी की लंगार।
 मूर्ख मनै दी रीझै,
 दित्ती जिंदगी दी हार।
 रीझे बे-बनदियें दे,
 निं किले सुआरेओ।
 अनमोल जिंदगी ऐ,
 हस्सी गजारेओ।




सांझ ते बंड

माहनू दे बस्से दी गल्ल निं,
ओ चाहे सो होए।
कदे-कदे प् हेज्जल बी,
बनी बैरी परतोए।
केई बारी ते खुन्ने बी,
गिट्टे ने पलचोए।
लक्ख बनाओ बनदी नेई,
नेई बननी जो गल्ल।
छावां-छौरे, धुप्प-तड़ाके,
जो भागें सो थोए।
माहनू दे बस्सै दी गल्ल निं,
ओ चाहे सो होए।
लगदा, हर पल क्षीण होआ दा,
मानवता दा जोर।
सब्बै अपने राग अलापन,
सब दी अपनी टोर।
भले-भलोके सुलझे माहनू,
होई गे आवाजार।
चंगे-मंदे भेत रेहा निं,
भरमै इच भलखोए।
माहनू दे बस्सै दी गल्ल निं,
ओ चाहे सो होए।

सबर-संदोख लोप होई गे,
 भाव-बचार भिड़ै दे।
 झूठे फुल्ल सुहाने बागें,
 तां गै अज्ज खिड़ै दे।
 अमर फलै दी भोली इच्छा,
 पूरी कियां होए।
 कल्प वृक्ष पर कंडेआरी,
 बेल जो नित्त मठोए।
 माहनू दे बस्सै दी गल्ल निं,
 ओ चाहे सो होए।
 कुदरत दा बिधान ऐ,
 टाहली धारै पत्तर फुल्ल।
 बक्खरे-बक्खरे रूप-सभाऽ न,
 इत्त दना निं पुल्ल।
 हुन केहड़ा संसार सिर्जना,
 कुदरत दे बिपरीत।
 इक्कै रूप सुभाऽ जित्थें,
 दुआ कोई निं होए।
 माहनू दे बस्सै दी गल्ल निं,
 ओ चाहे सो होए।
 मूल, फुल्ल, कंडे ते पत्तर,
 झुल्लियां टाहलियां।
 सुंदर इक शरीरै दे न,
 सुंदर अंग जियां।
 इक्क-दुए पर निर्भर सब्बै,
 लगदे न इक जान।
 अटल नियम ए कुदरत दे,

- कदेँ बी निं बदलोए।
माहनू दे बस्सै दी गल्ल निं,
ओ चाहे सो होए।
6. बिंद समझने दी ए गल्ल ऐ,
रत्ती भरा दा फेर।
तंग-ख्याली बिसरी जा,
जनै कबत्ती हेर।
भारत दे बसनीक भारती,
कोई बी की निं होए।
राम-रहीम, गुरू सब सांझे,
इत्थे बंड निं होए।
माहनू दे बस्सै दी गल्ल निं,
ओ चाहे सो होए।



खेढ

चित्तरकार,
लीकी जा दा आप मुहारा नेकां चित्तर।
इंदे इच न,
पशु-पैछी
जंगल-जाड़।
नदियां-नाले,
उच्चे फ़ाड़।
दिक्खे ते अन-दिक्खे थाहर।
किश सच्चे,
किश नि'री कल्पना,
सुखनें दा संसार।
केई रंगें दा मेल करा दा,
थुपदा जा दा,
चिट्टा-काला, पीला-लाल।
रंग बरंगे चित्तर लग्गन अति सुहने,
बेजान, अति मन-भाने।
तां दिक्खो घम्यारै पासै,
जिन्ने आवा ताए दा।
इक्क बक्खी मिट्टी दी घानी,
दुई चक्क चलाए दा।
ठप्पी जा दा केई खडौने।
केई आकार न,
कद्ध-बुत्त बी बक्खो-बक्ख।
लम्मे-छुट्टे,
पतले-मुट्टे।

गोल-त्रेढे,
 सिद्धे-पुट्ठे।
 तुसे छोड़ी दित्ता दा ऐ। हुन करना ऐ।
 किश हौले किश भारे,
 किश सच्चे,
 किश चित्रकारै साईं नि'री कल्पना।
 रंग-रंगीले ऐ खड़ौने,
 तस्वीरें साईं,
 सबने दा न मन परचांदे,
 हर घरै दी शान बधांदे।
 ते माहनू,
 जिसगी प्रभु नै आप बनाया,
 इंदे मने च छप्पे सारे भाव पढ़ी लै।
 पर कुदरत दा भेत निं जांता।
 ए इक कल ऐ ऐसी,
 रात-दिनै दी चाला जेहड़ी चलदी जादी,
 बिधना दे सब कारज पूरे करदी जा दी।
 ए स्रिष्टी दी रचनाकार,
 सारे जीबे दी ऐ जननी,
 बक्खो-बक्ख जिंदे रंग रूप,
 बक्खो-बक्ख जिंदे अकार।
 दुनिया दे आबे इच,
 ए सब पकदे जा दे।
 सूरज दे सत्त रंग बी न,
 चढ़दे जा दे।
 दुरदियां फिरदियां ए तस्वीरां,
 मुहं बोलदे ए खड़ौने,
 अपना घर सजाया जियां,
 प्रभु दा घर सजांदे न।
 अपना मन परचाया जियां,
 प्रभु दा मन परचांदे न।

बत्तां ते मंजल

बक्खो-बक्ख बत्तां, मंजल ते ऐ इक्क,
बत्तेरे राह-रहांदू, मकसद ते ऐ इक्क।
कुसै गी ऐ ऐहलतें दे जोरै प् नाज,
बलगदे कुसै गी न गड्डियां ते ज्हाज।
पुज्जा कोई बिंद मारी सबेल,
परेशां करै दी कुसै गी कबेल।
पुज्जे सखाले जां औखे बिंद क,
बक्खो-बक्ख बत्तां, मंजल ते ऐ इक्क।
मंजलै दी काहली नै दित्ते बतेरी,
डिगै-ढवै दे, रुकै दे निं हेरी।
काहली च काहली बी कैसी समाई,
निं बल्लै दे बारी गी अपनी सुदाई।
पुज्जे सबेल्ला जां चिरे बिंद इक,
बक्खो बक्ख बत्तां, मंजल ते ऐ इक्क।
माया दा जुग ऐ तां रज्जै निं करदा,
नशे इच बी भगती दे होआ बे-परदा।
अज्ज नैमतें दी बरै दी फुहार,
हस्सी चक्खै तां जीने दी ब्हार।
मनै इच बदै दी प् खलबली ऐ नित्त,
बक्खो-बक्ख बत्तां, मंजल ते ऐ इक्क।



दुमेल

नमै जुगै ने पुट्टियां जां, गैई लम्मियां,
हर बक्खी सुनचदी ऐ, नित्त नमी गल्ल।
कुदरत बी तज्जे जियां, नियम न अपने,
जेठ-हाड़ पालें दी तां, बनी दी ऐ गल्ल।
हारे बी चुना, जियां सौन-भादरो,
मूंह बाकी करै जिमी, पानियै दी गल्ल।
आखदे, संवरेआ, तदूं हा थाहर-थाहर,
मने शा उंदे पुच्छो, जिने झल्लेआ कबल्ल।
नरोई गल्ल आखदे न, नुक्ता चीनियां,
घरैक्खियां प् दिंदे न, असें गी अज्ज-कल्ल।
बनाया जिस मालकै नै, नुक्ताचीन गी,
उस्सै बनाया, दुनिया इच बे-पनाह कबल्ल।
गेंदा, गुलाब बनदा निं, ना, चंबा, मोतिया,
थाहर-थाहर रक्खना गै, सुरतिया दी गल्ल।
नभाऽ फर्ज अपना, लगनै नै दोस्ता,
दुनिया घड़ी बसांऽ ऐ, कैसी ऐ मारी मल्ल।
सज्जै-खब्बै रिदै दे, सब्बै न अपने रूप,
धीयें फी की करै दा एं सीने च उंदे सल्ल।
अपने प् रैहम कर, कमाऽ नेक-नामियां,
सदा ब्हार चीज ऐ, इक्क-रूपता दी गल्ल।
बड्डे-बड्डे "माँटो" लिखे, जगह-जगह,
बरतने च आई प् किश होर गै ही गल्ल।

पुच्छो, कियां पछानना, खुट्टा ऐ जां खरा,
 जेड़ा-जेड़ा गेआ चली, सिक्का ऐ उयै बल्ल।
 इट्टे-बट्टे तुलै दियां न, खानदानियां,
 इन्सानियत दबोई गई, नीहें दे बी ख'ल्ल।
 अजें ते उरला कंढा ऐ, होआ की परेशां,
 पैरे अजें चकोने न, बदने जदू न छल्ल।
 गल्लै नै गल्ल आखदे, करचै बी केहड़ी गल्ल,
 गल्ल निरी गल्ल जो, बनदी नेई ओ गल्ल।
 ठुकराई दिक्खो बिंद क, रीझां बे-बनदियां,
 जे दिक्खना, अजीज दे किन्ने अजीज तुस।
 चोपड़े सुआरना ऐ, सुरतै गी के,
 सद-गुण सदा सुआरदे, भाएं कनेह ओ तुस।
 भागे दे मत्थै थुपदे, सब्बै न कालखां,
 ब'रन जे बाह-बाहियां, चुनने आले ओ तुस।



शोखियां

अज्ज दौड़ शोखिये दी, फिकके-फिकके प रंग।
 रंगे गी ऐ गुहाड़दा, सुगंधिये दा संग।
 खिड़ियां न भाएं फुल्ल-बाड़ियां, जगह-जगह,
 लदोइयां बी न टाहलियां, फुल्ले नै बे-बहा।
 जहरा न भाएं लुभा दे, मलाप रंगे दे,
 चुंदिया दे अक्खिये गी, लशकार रंगे दे।
 रुस्सी गेई सुगंध, जिस तज्जेआ ऐ संग,
 रंगे गी ऐ गुहाड़दा, सुगंधिये दा संग।
 कुतै-कुतै जे है बी ऐ, सुगंध फुल्ले दी,
 झकदी निं द्वार खोहलदी, डरी बबूले दी।
 बदली जंदी बद-ऐमनी, खुशिये च बे-पनाह,
 सुगंधिये नै रंगे दी, हुंदी जे एकता।
 जीन जिंदुआ दा ऐ, आत्मा दे संग,
 रंगे गी ऐ गुहाड़दा, सुगंधिये दा संग।
 बदलों-दियां परिभाशां, ते जाहरदारियां,
 सीमाएं गी लुआंघदियां सगोसारियां।
 मनुक्खता गी छलै दे न, ओपरे ए रंग,
 सचाई गी छपैलना, नमै जुगै दे ढंग।
 मनुक्ख पर मनुक्ख ऐ, मनुक्खता दे संग,
 रंगे गी ऐ गुहाड़दा, सुगंधिये दा संग।



घर-कुहाडू

फितरत कैसी मने दी ऐ मेरी,
फरेबी छलै दा मिगी गै झखेरी।
कदे ते ए औदा निं पकड़ै च मेरी,
कदे फी दड़ी जा ए कोठी च न्हेरी।
सैहमे-डरे दा बी निर्लज्ज हेरी,
फरेबी छलै दा मिगी गै झखेरी।
कदे ते ऐ त्यार ए मरने-मराने,
अपने बी समझै कदे ए बगाने।
शतान ऐ शक्की करै हेरा-फेरी,
फरेबी छलै दा मिगी गै झखेरी।
लिंथा-लालची ऐ लींदा चुआंदा,
नित्त नमें भोगें दा घोरी खुआंदा।
नट-खट, स्वादू निंदोआ चफेरी,
फरेबी छलै दा मिगी गै झखेरी।
पाई जराने सरगगे तां पूरै,
कदे ते अभारी कदे फी प् घूरै।
चलांदा जुल्म-गुंडागरदी दी न्हेरी,
फरेबी छलै दा मिगी गै झखेरी।



गल्लां

नदी जां भीड़ छल्लें दी,
मनै इच हाड़ गल्लें दा।
चबक्खै मुस्कराहटां,
मनै तड़फाड़ गल्लें दा।
हौलिया बरेसा, गल्लां बी, हौलियां,
हासे ते गड़ाके, रोसे ते गालियां।
मन-भाने साथिये नै, गुट-बंदियां,
बस्सियां मनै च, कदे बी नि जंदियां।
गुद-गुदांदियां, मनै गी चेतै औदियां,
बतूरियां प् इक्क थां, कदे निं रौहंदियां।
कदे तें मान-सम्मान बी न ए दुआंदियां,
कदे बनी-बनाई छवी गी गुआंदियां।
कदे बरखा ए फुल्लें दी, कदे परहार भल्लें दा,
चबक्खै मुस्कराहटां, मनै तड़फाड़ गल्लें दा।
सुखने च कदे, मेरै श न आई बौहंदियां,
बझालदियां सुरत, ते गलै ए पौदियां।
भन्नी-तरोड़ी सुखने, मनै गी रुआंदियां,
हीखिये च बन्नी, कदे ए न सहांदियां।
चेतें दियां सुगंधियां, समां बनांदियां,
बिछड़े कदे दे जेड़े उन्नेई मलांदियां।
ठहोलड़े कराई, कदे-फी जगांदियां,
रज्जियै खड़ौने साई, ए खडांदियां।

कदे ऐ शक्क इंदे पर, कदे बसांह बी गल्लें दा,
 चबक्खै मुसकराहटां, मनै तड़फाड़ गल्लें दा
 कदे ते सामर तक बी न आई खड़ोंदियां,
 औदियां तां औदियां, फी नई थम्होंदियां।
 खिने-पलें मठोंदियां जुआन हुंदियां,
 बदलदियां सरूप जदूं नेई पंछोंदियां।
 मनै नगोड़े पर, ए नित्त रौहंदियां सुआर,
 ह्फांदियां, फमांहदियां रक्कड़-रखोड़े थाहर।
 सोचेओ बचारेओ, गल्लें गी तोले-ओ,
 निरपक्ष सुआतम, इन्नेई नेई खंदोलेओ।
 घटै फी भीड़ छल्लें दी, घटै तां हाड़ गल्लें दा,
 चबक्खै मुसकराहटां, मनै तड़फाड़ गल्लें दा।



उपकार

के गिननियां-गिनानियां रब्बी न बरकतां,
 खलारियां चबक्खै, 'उस' नेकां नैमतां।
 अमृत दा घड़ा छलकदा, औदा जदूं ऐ सौन,
 प्राणें दा भंडार बी, चलदी ऐ मस्त पौन।
 बेजान, बे ज़बान, प् शक्ती ऐ बे-पनाह,
 सुत्ती नमानी मिट्टी च जगदी तां चेतना।
 नेकां ए रूप धारदी, अपार शक्तियां,
 खलारियां चबक्खै, उस नेकां नैमतां।
 कुतै ते सूहे-पीले, फुल्लें सजाई सेज,
 बखेरेआ जां कुसै, मटयारै दा दहेज।
 मिट्टुड़े संगीत बी, पैछी न छेड़दे,
 मस्तियें गलतान, चुंजां न भेड़दे।
 मस्तियें प् बी, छाइयां न मास्तियां,
 खलारियां चबक्खै, उस नेकां नैमतां।
 निक्के-निक्के नाडुएं, जुआत्री आई दी,
 खेड्डै दे छप्पी-छप्पी, खेढ छू-छपाई दी।
 छपदे-छपांदे झांजरें प् डंड पाई दी,
 लगदा कुसै कुतै, सुरीली भाख लाई दी।
 छाई गेआ चबक्खै, इक्क रौसला समां,
 खलारियां चबक्खै, उस नेकां नैमतां।
 झोली छपैली रक्खियां, बे-संभ बरकतां,
 हीरे ते चांदी-सुन्ना, के-के गिनी सुनां।

सब्बै न रज्जी-पुज्जियै, पूरै दे लोड़-थोड़,
 फी होर बी समेटने दी, लग्गी दी ऐ होड़।
 भंडार रक्खै खोह्लियै, लुकाई दी पासवां,
 खलारियां चबक्खै, उस नेकां नैमतां।



पागल हिरखी

जे कीती कुसै गल्ल हिरखै दी भुल्ली,
 तां जुल्मै दी अंधी झुल्ली गै झुल्ली।
 पागल पतंगा तां अग्गी नै खेढै,
 दिलदार मौती गो रेहडै गै रेहडै।
 हिरखै च पागल दना बी निं संगै,
 हस्सी-हस्सी जान सूली प् टंगै।
 सदा गुन-गुनांदा ओ हिरखै दे गीत,
 कोमल ऐ काया प् सच्ची ऐ प्रीत।
 लट-लटी लाटै गी छाती जां लाया,
 तड़-तड़ तड़ाकै ही खूसी तां काया।



इक्क सलाह

बे-ताल सोचें दा, बुनेओ निं जाल,
 सोचें दी अपनी, रक्खेओ संभाल।
 चकराया सिर, तां लत्तां भिड़. न्यां,
 रीसो-रीसा, बाहवां बिड़कियां।
 डिगै-ढवै दे, भज्जै दे नक्क।
 पेई चक्करें, हरान होआ बी त्क्क।
 सारे दे सारे न, होए बे-हाल,
 सोचें दी अपनी, रक्खेओ संभ न।
 जखमें गी किन्ने क् देगे टकोर।
 पिछले भलोए, बनी जाने होर।
 गलती कुसै दी, ते भुगतै दा मोई,
 चक्कर सिरै, लत्त ऐवें मरोई।
 नोचो सिरै गी, चलै टेढ़ी चाल,
 सोचें दी अपनी, रक्खेओ संभाल।
 सिर ऐ शोभा, शरीरै दा ताज,
 मनुक्खै गी, बे-शक्क, इस पर ऐ नाज।
 नरोआ र'वै, बरकतां बे-हसाब,
 दना भर कसरी तां, खाना-खराब।
 धमक्कड़ मचांदा, बे-काबू भंचाल,
 सोचें दी अपनी, रक्खेओ संभाल।
 बरै दी तमें दी, जो तत्ती फुहार,
 अजब इक्क पनीरी, करै दी त्यार।

सोचें प् सब दी, तमा ऐ सुआर,
ना सच्चै नै जारी, ना माहनू नै प्यार।
सोचें नै करेओ, कदे निं मलाल,
सोचें दी अपनी, रक्खेओ संभाल।
चरजै दी गल्ल ऐ, तां माहनू दुआस,
अन-होनिये, अज्ज साजे दे साज।
मनुक्खता जखोऐ दी, इट्टे-बट्टे नै,
सिदक लोप होए, तमें दी शटे नै।
बचाएओ, मनुक्खता गी होऐ निं घाल,
सोचें दी अपनी रक्खेओ संभाल।



बे-बसी

घरोंदैं ध्याड़ै, जां चढ़दैं फी चन्न,
सोचें च डुबदा, ते तरदा ऐ मन।
झुसमुसै अंबर, कल्ला इक तारा,
अकखी मिड़कदा, जां बे-बस बचैरा।
मन ऐ दुआस, तां बैठा दा ओहलै,
बिट-बिट दिक्खै, प् मूंहा निं बोलै।
बदलुएं च सिमटी, छपैलै तां तन,
सोचें च डुबदा, ते तरदा ऐ मन।
बिंद-बिंद घनोऐ, जां दुनिया च न्हेरा,
गासा च चानन, खिड़ै जां सबेरा।
तारें दी टिम-टिम, तां लगदी सुहानी,
सुनांदी ऐ, बीते जुगें दी जो कहानी।
प् भांदा दुआसी निं, कोई समागम,
सोचें च डुबदा, ते तरदा ऐ मन।
रक्खेआ जां रातै, जुआत्री च पैर,
मनै पर, बीती-बीती गे कैहर।
सां-सां, हूं-हूं, फी डुसकारियां,
बे-बस हौके, ते किलकारियां।
सिज्जा अथरूएं, बी ऐ तन-बदन,
सोचें च डुबदा, ते तरदा ऐ मन।
पेई गास-गंगा दी, फिक्की नुहार,
पूर्व घुहाड़े जां, लोई दे द्वार।

चनै शा सैहमे दिनै शा डरे दे,
सारे तां तारे गुठै दडी गे।
जियां बे बसी ग्रस्सेआ ऐ कण-कण,
सोचै च डुबदा, ते तरदा ऐ मन।



धोखे

असें हे भलाए, मनै फी बी घोखे,
खादे जमाने च, किन्नै गै धोखे।
पछूकें नमें, घाह पराने जगाए,
मनै इच सोचें तां घरमोल पाए।
खौली कदें रत्त, कंबी बी काया,
लाचारियें, भुल्लें भैह गी जगाया।
निम्मो-झानिएं दे प्रेता दा साया,
पुज्जा तां बे-रोक लंघी झरोखे।
असें हे भलाए मनै फी बी घोखे,
खादे जमाने च किन्ने गै धोखे।
कुतै फी जताइयां, जे ह्मदर्दियां,
परते च थ्होइयां, प बेदर्दियां।
होआ अपना-पन, अपना बगाना,
घूरी तां दिक्खै, ते ह्स्सै जमाना।
फुल्लडू, शलैपे दे मानै पसोए,
घरैक्खै दे डाली गी, जिस नै सरोखे।
असें हे भलाए, मनै फी बी घोखे,
खादे जमाने च, किन्ने गै धोखे।
पड़ाई शा पिच्छे, जां मारी नगाह,
भागें प् किश पल, होआ तां बसाह।
पलचोई बत्तें, प् दित्ते त्राह,
संजोआ मनोबल हा, कीता फनाह।

कंडे अजें बी, करै दे प् हेर,
सजाए दे सुखने, जिनें हे बखोखे।
असें हे भलाए, मनै फी बी घोखे,
खादे जमाने च, किन्ने गै धोखे।



भ्राऽ-भ्राऽ

इक्कै कटुंबै दे सारे भ्राऽ,
 भंडै कुसी, कुसी कोई सराह।
 इक्क आखदा, में तेरे थाहर बौहना,
 दुआ गलांदा, निं तेरे नै रौहना,
 रोहें गलांदा, निं तेरे नै कूना,
 दोखी एं खुन्ना, तू घूआं-शतूना।
 इक्कल सोख, घूरी देऐ त्राह,
 भंडै कुसी, कुसी कोई सराह।
 बे-बनदी रीझें, जे थोऐ निं मान,
 जंदी गै जंदी, तां रौहदी निं शान।
 घोखै, गुआंढी दी बदली दी चाल,
 होए अजादी कनै, माला-माल।
 मनुक्खता दा खंदे, दना निं बसाह,
 भंडै कुसी, कुसी कोई सराह।
 लाह इक्क नेई, भाएं हानियां लक्ख,
 साथें निं निभदी, तां रौहना ऐ बक्ख।
 नरोआ र'वै, भाएं त्रुट्टी जा लक्क,
 मूंह-जोर मनदा निं, पांदा कपत्त।
 निझक्के, रेहा निं कुसै दा त्राह,
 भंडै कुसी, कुसी कोई सराह।
 बीते सबेरे गी, घोखै दपैहर,
 सजां बी, छौरें ते न्हेरें दे कैहर।

अपना-पन, गुआचा-गुआचा दा लग्गै,
 फुल्लडू समोधै दा, भुरडोआ लब्भै।
 लगदा रेहा निं, ए घर ओकड़ा,
 भंडै कुसी, कुसी कोई सराह।
 भावें दे जोशै, न रिशते भलाए,
 कुसै भूत पेले, ना जादू चलाए।
 शंके मनें इच, डेरे जमाए,
 अपने बझोदे, तां बखले-पराए।
 सज्जे, निं खब्बे दा रेहा बसाह,
 भंडै कुसी, कुसी कोई सराह।
 देसा दा जाया, बदेशें दा चाहणू,
 अपना प् होआ ऐ बे-पन्छानू।
 अपना-पन गुआचा, तां बाकी रेहा के?
 फी बी गलांदे, गेआ के गेआ के।
 होआ बदेशी तां देशी भ्राह।
 भंडै कुसी, कुसी कोई सराह।



मेरे साथी

मेरे साथी बट्टे-बूहटे, तत्ती-भुब्बल, ठंडा-पानी,
शारें नै समझा करदे, ए जुगें-जुगें दी कहानी।
निक्के-मुट्टे नरम-मुलैम, बट्टे बत्त सुआरी दी,
कुतै ते पैन्नी आरी जन, इक्क दंदराल पसारी दी।
छूहदे सार गै करदे, कोमल पैर ए लहु-लुहान,
भुक्खे दे भग्याडै साई, लहुए डीकां लान।
इस दा अत्याचार, मन ऐ दुए दा पिघला करदा,
दुई गैइ फट्टी जिंदू, रूआं दा फाहेया ला करदा।
इंदे नै मेरा रिश्ता, जां पनछान ऐ कोई परानी,
शारें नै समझा करदे, ए जुगें-जुगें दी कहानी।
कोमल ते कंडयारे बूहटे, मिलै दे बाही खलारे,
किश ते खिन भर चैन बी दिंदे, पर किश चुब्भ न्यारे।
मेरे ए बदलोंदे भाव न, जिंदा नेई भरोसा,
मेरे मिगी मिलै दे इयां, गैरें नै के रोसा।
धीरज थ्होदा, फी त्रुटदा, हर पल चैता चरदी,
जीने दी इच्छा बी मेरी, डुब्बी-डुब्बी तरदी।
भन्न-बगाड़ ते फी नरमान, पा करदे न रहानी,
शारें नै, समझा करदे, ऐ जुगें-जुगें दी कहानी।
तत्ती-भुब्बल, ठंडा पानी, सिश्टी दा अधार,
समें-समें पर धारन करदे, नेकां रूप-अकार।
मेल होऐ दे फी बिछडै दे, सब समें दा फेर,
जनम नमां पाने तै हर शै, करै निरंतर हेर।

हर खिन हर शै बदलै करदी, बदलै दी तसीर,
तेरी-मेरी ते सब दी, ए असली तस्वीर।
दुनिया दी पोथी च अंकत, हर थां मेरी नशानी,
शारें नै समझा करदे, ऐ जुगें-जुगें दी कहानी।
मेरे साथी बट्टे-बूहटे, तत्ती-भुब्बल, ठंडा-पानी,
शारें नै समझा करदे, ए जुगें-जुगें दी कहानी।



सीमत परोआर

सुख लौहके परोआरा दा,
पछताऽ दे जिंदा बड्डा ऐ।
जीवन दी बेली दे फुल्ल,
सुंदर बाल- ज्याणे न,
इक्क-दौ शा बद्ध भला,
सोचो कियां पत्याने न।
रीझ के पूरै लाबे दी,
पेदे रुट्टी दे लाले न।
मते ज्याणे गिझदे नित्तल,
बनदे जालो-खाले न।
मत सोचो परोआर बधाई,
थ्होना तुसेई मुरब्बा ऐ।
सुख लौहके परोआरा दा,
पछताऽ दे जिंदा बड्डा ऐ।
बरै-बरै होए न्याने,
इक्क-दौ ते चार।
फुलबाडी लेई होन सरोखड़,
झांकै हड्डे बाहर।
होर मठोए, हुन निं सुनदे,
आखा भड्डुए तेरा।
समाधान, हुन लभदा नेई,
सोचें पाया घेरा।

रात-दिनै दी पच्छोताई,
 बीता समां निं लब्धा ऐ।
 सुख लौहके परोआरा दा,
 पछताऽ दे जिंदा बड्डा ऐ।
 अज्ज आंदे तां कल्ल मुक्के दे,
 आटा, तेल, बसार।
 तलबा मूल निं पूरी पौदी,
 चुक्के बिना दुहर।
 घ्यो-दुद्धै नै छिन्ना होआ,
 जीदे-जी नभाना ऐ।
 अंदरों-अंदर मन रोंदा,
 पर जाहरा फी मुस्काना ऐ।
 मरी गेइयां सब शौकां-रीझां,
 खाई लैना जो लब्धा ऐ।
 सुख लौहके परोआरा दा,
 पछताऽ दे जिंदा बड्डा ऐ।
 बखले बाल-व्याणे दिक्खी,
 मन खंदा हचकोले।
 कंबदे ओठ थरकदी जीभ,
 रेही जंदी बिन बोले।
 मन झंजोडै आखी,
 "तूं दित्ती हुन बाजी हारी"।
 समां मुहांदे जो,
 "रोंदे तेरे साईं जारो-जारी"।
 समें दी सार पछानी जिन्नै,
 उयै सब शा बड्डा ऐ।
 सुख लौहके परोआरा दा,
 पछताऽ दे जिंदा बड्डा ऐ।

मन ते चांहदा
 घर-फुलबाड़ी औ बी शैल सजांऽ
 हर फुल्ल फुलबाड़ी दा,
 हस्सै औ मुस्कांऽ।
 नच्चन मस्त ब्हाऊ इच कलियां,
 झुल्लै टाहली-टाहली।
 उल्टे कर्म-कमाए प् आपूं,
 औ बद-किस्मत माली।
 कि 'लदा, हुन, निं भार झलोंदा,
 टुरदा जड्डा-जड्डा ऐ।
 सुख लौहके परोआरा दा,
 पछताऽ दे जिंदा बड्डा ऐ।
 रज्जी थोई ना भुक्खे रेह,
 नां नंगे, ना खट्टे।
 भुस्सी डिड्डु नुहारां बनियां,
 झुलदे बैहं दे मट्टे।
 कलियां ए खिड़ने शा पैहले,
 लगी दियां मुरझान।
 सब किश ऐ पर नेई,
 इंदे तै सुन्ना ऐ ए ज्हान।
 कैको रौला पेदा,
 लगदा पखी-मारें दा अड्डा ऐ।
 सुख लौहके परोआरा दा,
 पछताऽ दे जिंदा बड्डा ऐ।
 मते व्याणे औदन थोदी,
 पूरी मूल निं पौदी ऐ।
 प्रमे नै साथ नभाना कियां,

समझा गल्ल निं औदी ऐ।
लैनदारें दा सबर त्रुट्टा,
आई वराजे बेहड़े च।
ठैठरपाल, भुक्ख-भांगड़े,
फसेआ कच्चे गेडें च।
जाम होई गेई जीवन-गड्डी,
बनेआ भारा गड्डा ऐ।
सुख लौहके परोआरा दा,
पछताऽ दे जिंदा बड्डा ऐ।



दाज

मान-सम्मान देऐ सबनें गी,
तां आदर्श समाज।
बे-बसें गी लुट्टै निं,
आखी नूहें दा दाज।
शादी इक्क पवित्र बंधन,
फी बी सौदा बाजी।
दाजै-दानै बिन प,
हुंदे नेई सरबंधी राजी।
बे-न्याई गी हक्क जताई,
बे-बस, बे-कस करना।
कुड़ी आलें घर न्हेरा पाई,
अपनै चानन करना।
भुल्लै निं, दिन औना,
बारी-बारी फेरें फसना,
कल तुसें पछताना,
लोकें दिक्खी-दिक्खी हस्सना।
चैन मनै दा लुट्टै जो,
कित्त कारी ओ र'वाज।
मान-सम्मान देऐ सबनें गी,
तां आदर्श समाज।
फुल्ल न इक्क फुलबाड़ी दे,
जातक कुड़ियां सारे।

मात-पिता दी अक्खी दे,
 दोए चमकीले तारे।
 इक्क-दुए बिन, बे-कारे,
 ना-कारे, कुसै निं जोग।
 जातक जम्मै, खुशियां आइयां,
 कुडियां सनमुख सोग।
 "शाह आई गे" आखन,
 करदे नफरत अपनी जाहर।
 जीदे-जी दबाने शा बी,
 टलेआ नेई संसार।
 दम-घोटू ए निग्गर घेरा,
 कीते पुट्ठे काज।
 मान-सम्मान देऐ सबनें गी,
 तां आदर्श समाज।
 कच्चे धागे दा इक्क बंधन,
 दौ धड़ें बश्कार।
 आपूं चे सुख-दुख बंडने,
 बनदा ऐ अधिकार।
 सरसी-नरमी संग नभाना,
 प्रण ऐ शादी।
 लक्खे खिड़े बगीचें दी,
 फी बी होऐ बरबादी।
 सुखनें दा ए मैहल सुनैहरा,
 जिन कीता बरबाद।
 ओ माहनू नै आप बनाए,
 पुट्टे रीत-र'वाज।
 नाता जुड़ेआ मूल निं,
 दाजै कीते दोए नराज।

मान-सम्मान देऐ सबनै गी,
 तां आदर्श समाज।
 दशा के होग, सोचो विंदक,
 माता-पिता लचार।
 छे सौ जिंदे कश निं,
 कुत्थूं कड्ढेन सट्ट हजार।
 बिन कड्ढे पर कड्ढेन डोला,
 गल्ल ऐ अति महाल।
 र'वै कुआरी जां जीवन भर,
 बनियै इक्क ममाल।
 ऐ अडकूनी काल-सरूपी,
 जगह-जगह बदनाम।
 आत्म-हत्या ते बदकारी,
 इसदे गै परिणाम।
 अटल बने दा अज्ज वी लब्धै,
 इस धारा दा राज।
 मान-सम्मान देऐ सबनै गी,
 तां आदर्श समाज।



गलिया दा चन्न

गलिया दा ए जगदा लाटू,
जां गलिया दा चन्न।
इस दे सनमुख चोर-उचक्का,
फड़कै कोई निं कन्न।
रात-रात भर जलदा रौहदा,
पाले-हुस्सड़ सब किश सैहदा।
कल्ल-मुकल्ला, खिड़-खिड़ हस्सै,
राह-रहांदुएं रस्ता दस्सै।
वड्डा होऐ जां लौहका लाटू,
ए न्हेरे दी तक्का, ताकू।
जिन्नो मती घनेरी रात,
होर बधै तां इस दी ठाठ।
जिंद जालदा चानन करदा,
इस दा जीवन धन्न।
गलिया दा ए जगदा लाटू,
जां गलिया दा चन्न।
इस दे सनमुख चोर, उचक्का,
फड़कै कोई निं कन्न।
सूली दे टंबै लटकोआ,
फी बी फर्ज नभांदा ऐ।
मस्स कालिये रातें इच,
जीने दी बत्त सुझांदा ऐ।

न्हेर-मन्हेरे गली-बजारें,
छाई चपासै सुन्न-मसान।
उगधड़ेआ ऐ त्रीया नेतर,
हस्सी सारै चिटक-चनैन।
ए लोई दा रक्षक,
पांदा न्हेरें गी ऐ डन्न।
गलिया दा ए जगदा लाटू,
जां गलिया दा चन्न।
इस दे सनमुख चोर-उचक्का,
फड़कै कोई निं कन्न।



सुखना

ए कैसा सुखना मेरा,
मेलै दा संज-सबेरा।
दुनियां दी नजरे शा बचदा,
लाचारी शा डरदा-झकदा।
बे-बसी दा लेई आसरा,
मन रोदा पर जाहरा हसदा।
जाई पुज्जा इक्क थाहरै पर,
नि'रा कलापा जित्थे बसदा।
छू-छपाई दी खेढा रुज्जे,
दिक्खे चानन-न्हेरा।
ए कैसा सुखना मेरा,
मेलै दा संज-सवेरा।
शिकल दपैहरी दिखदे-दिखदे,
काले बदलै न्हेरा पाया।
पलै-खिनै इच होआ जल-थल,
रोढ़ी नाले हाड़ हा आया।
बट्टे-बूहटे लेई गोआ रोढ़ी,
ओ प्रलया दा साया।
प्रलय नेई अमृत हा बरैआ,
ह्रदय शा दना सखेरा।
ए कैसा सुखना मेरा,
मेलै दा संज-सबेरा।

छप्पी बैठा पड़ियां हेठ,
दिक्खै दा औ ए नजारा।
मारू भौड़ें दे इच फसेआ,
गोते खाऽ दा मन बचैरा।
तां जे प्रलया शांत होई,
घटना लगा तां न्हेरा।
सतरंगी दी बाहें पाया,
पूरब-पच्छम घेरा।
ए कैसा सुखना मेरा,
मेलै दा संअ-सबेरा।
ठंडी पाला जिंद ही होई,
दिन बी खिट्टे पेदा।
लाई छड़प्पे ओहदा पीछा,
करै दा जालम न्हेरा।
सबर त्रुट्टा पैर टुरी पे,
थौह निं रस्ता केहड़ा।
झुनकी कुसै जगाया,
होआ लत-पत हा तन मेरा।
ए कैसा सुखना मेरा,
मेलै दा संअ-सबेरा।



बच्चे

चैचल-चपल, सरल सुभाऽ,
मन बी सुच्चें सच्चे।
देसा दा अनमोल खजाना,
प्यारे-प्यारे बच्चे।
जीवन दी फुलबाड़ी दे,
फुल्ल ए रंग-बरंगे।
बारस अपने देसै दे,
मस्ती दे रंग रंगे।
चंगे-मंदे भेत कोई निं,
हर कोई इंदा जार।
इक्क-इक्क मुस्कानै चा,
डुल्लै बे-संभ प्यार।
द्रिढ़ न इंदे निश्चे बी,
अपनी धुनै दे पक्के।
देसा दा अनमोल खजाना,
प्यारे-प्यारे बच्चे।
तोतलियों गल्लें दे कन्नै,
जग सारा न मोहै दे।
मुस्कानें दे जादू नै,
मैल-मलाल न धोए दे।
मन-मरजी दा होए बरोध,

लगदे तां दुस्कान।
 छाती जे चमकाया हस्सी,
 परतै तां मुस्कान।
 लाड-लोरियें शैल तराशे,
 हीरे सुच्चे-सच्चे।
 देसा दा अनमोल खजाना,
 प्यारे-प्यारे बच्चे।
 बिन मठेआई राजी,
 इन्नै भांदा लाड-प्यार।
 नेई तां सत्याग्रैह करने तै,
 म्हेशां ऐ त्यार।
 जोरें गल्ल कर्दे निं मनदे,
 करदे सदा बरोध।
 आदर-माने बे-बस होई,
 पूरै दे अनुरोध।
 जिंद व्याणी कोमल,
 पर नेई निश्चे इंदे कच्चे।
 देसा दा अनमोल खजाना,
 प्यारे-प्यारे बच्चे।



बचपन, जुआन्नी, बुढ़ापा

कोमल फुल्ले दी ऐ गाथा,
जां जीवन दी कहानी।
भोला बचपन, चतर बुढ़ापा,
आसें भरी जुआन्नी।
कलिये साईं मुस्कांदा बचपन,
ठंडी छावां पलेआ।
सरसी-नरमी इक्क बरोबर,
दिन चढ़ेआ जां ढलेआ।
बे-संभ हिरखै मात-पिता बी,
बे-अखत्यार बनाए।
बे-अखत्यारे मूहा निकले,
नेकां नां धराए।
थां-थां इस दी चर्चा,
हर गल्लै इच भरै जुआन्नी।
सरल-सुगंध इस फुल्लै दी,
सबनें, दे मन भानी।
हर गल्लै दी रीस करै,
केई खेडां खेडी दस्सै।
अपने नै जो बीती,
सारे नाटक खेडी दस्सै।

इत्थूं दा जां रंभ होई,
 जीबै दी जीवन-कहानी।
 कोमल कलियें दी ऐ गाथा,
 जां जीवन दी कहानी।
 भोला बचपन, चतर बुढ़ापा,
 आसैं भरी जुआन्नी।
 बचपन होआ बिदा,
 हांबी-हांबी मिली जुआन्नी।
 नेकां आसां मनै संजोई,
 ठिल्ली पेई दिवानी।
 बहु-रंगे सुखने जीवन दे,
 होन लगे साकार।
 असली दा अज्ज नकली नाटक,
 लैन लगा ऐ थाहर।
 नकली झगड़े, खेढां रीसां,
 फी सुआंगी व्यवहार।
 बारी-बारी असली रूपें,
 होन लगी पे जाहर।
 बे-बसी गी बस करी लै,
 बे-काबू गी काबू।
 हर मुशकल असान करी लै,
 ए जोबन दा जादू।
 इतिहास गवाही गल्लै दी,
 दित्ती जो इस कुर्बानी।
 कोमल कलियें दी ऐ गाथा,
 जां जीवन दी कहानी।
 भोला बचपन, चतर बुढ़ापा,
 आसैं भरी जुआन्नी।

बीती ब्हार जुआन्नी दी,
 तां आया चतर बुढ़ापा।
 संगी संगदे संग नभांदे,
 पेआ र'वै कलापा।
 पत-झड़ दी ए रुत जां आई,
 होई गे ठैठर-पाल।
 दुनिया तै के करना,
 हुन ते अपनी गलै निं दाल।
 नकली दाढ़ी-मुच्छ, बुढ़ापा।
 असली रूपे लब्धे।
 नकली कुब्ब बनाए कदे,
 अज्ज होई गे सच्चै कुब्बे।
 बहुरंगे इस नाटक दा,
 उयै सिरजन हार।
 उस्सै दियां रीझां पूरै दा,
 ए बे-बस संसार।
 अंग-पत्तियां भुरड़ोई गे,
 समें दी ऐ मन-मानी।
 कोमल कलिये दी ऐ गाथा,
 जां जीवन दी कहानी।
 भोला बचपन, चतर बुढ़ापा,
 आसे भरी जुआन्नी।



पिंड-ग्रांऽ

सुरग समान ऐ शोभा जिंदी,
उत्रेई के सरांह।
खुशिये दा भरपूर खजाना,
मेरे पिंड-ग्रां।
पत्ता-पत्ता आप नुहालै,
ओ राती दी रानी।
शंगारै कलिये नै,
इक्क-इक्क डाहली गी दीबानी।
मस्ती डुब्बे पंख-पखेरू,
लैदे प्रभु दा नांऽ।
खुशिये दा भरपूर खजाना,
मेरे पिंड-ग्रांऽ।
कलियां भरी कलाबे,
मुंह-न्हैरै किरने नै मिलियां।
चुमदे सार गै भोलियां कलियां,
खिड़-खिड़ हस्सी खिड़ियां।
खुशबूएं दा राज चबकखै,
की निं खुशी मनांऽ।
खुशिये दा भरपूर खजाना,
मेरे पिंड-ग्रांऽ।
बसदे भोले-भाले माहनू,

छल-कपट निं भाखा।
 खुशी-गमी इच बौहदे रलियै,
 बंडदे धीर-दलासा।
 मन गांदा ऐ गीत खुशी दे,
 की इस गी तरसां।
 खुशिये दा भरपूर खजाना,
 मेरे पिंड-ग्रां।
 सादा खाना, लाना सादा,
 मन बी सच्चे-सुच्चे।
 सच्चाई दे ए पुजारी,
 सदाचार दे उच्चे।
 जीना सरल बनांदे जेह्ड़े।
 इयै न ओ थां।
 खुशिये दा भरपूर खजाना,
 मेरे पिंड-ग्रां।



दुरना गै जीन ऐ

चन्न दुरा दा ते तारे दुरा दे,
दुरना गै जीवन तां सारे दुरा दे।
दुरदे गै रौहदे, कदे नेई बसोदे,
दुखड़े बी रोंदे निं, हुट्टे ते हारे।
जीवन दे न्हें च, हसदे गै रौहदे,
नभाऽ दे न, कुदरत दे सौपे दे कारे।
दुरा दा ए सागर, नजारे दुरा दे,
लिंछे बी सोटिया स्हारै दुरा दे।
चन्न दुरा दा ते तारे दुरा दे,
दुरना गै जीवन तां सारे दुरा दे।
नदियां दुरन, उन्ने सागर पुकारै,
लैहरें नै अपनी, ओ बत्तां सुआरै।
नाडू ते उयां निं, फुल्ले समांदे,
रुण-झुण सुरीले संगीत गांदे।
चलै दे न जादूं इंदे सुरा दे,
फणाके ब्हाऊ दे तां नचदे दुरा दे।
चन्न दुरा दा ते तारे दुरा दे,
दुरना गै जीवन तां सारे दुरा दे।
धरती दुरा दी, ते पर्वत दुरा दे,
धरती दे बसनीक, सारे दुरा दे।
शरीरें दे अंदर, लहु दुरा दा,
भाव मनै इच बी न्यारे दुरा दे।
बत्तां मकाने दी काहली समाई,
जिया-जैत के उंदे छौरै दुरा दे।
चन्न दुरा दा ते तारे दुरा दे,
दुरना गै जीवन तां सारे दुरा दे।

मेरा भारत

केई धरमे दा संग, इत्थे केई बोलियां भेस,
रंग-रंगीला गुलदस्ता ऐ, मेरा भारत देस।
सूरज-चन्न ते तारे, म्हेशां चाननियां बिखरांदे,
पैछी बी न, संज-सबेरै गुण प्रभु दे गांदे।
मूरत ऐ ए एके दी, निं फड़कै दना द्वेश,
रंग-रंगीला गुलदस्ता ऐ, मेरा भारत देस।
ठंडी-मिट्टी ब्हाऽ पुरे दी, नित्त सुगंध खलारै,
ममता दे बस धरती माता, बत्ते फुल्ल सुआरै।
कदम-कदम पर इस दी ममता, कट्टै सौ कलेश,
रंग-रंगीला गुलदस्ता ऐ, मेरा भारत देस।
नदियां-नाडू, डूंगे सागर, छेडै दे संगीत,
इक्क-दुए नै, भरी कलाबे, मिलै दी बिछड़ी प्रीत।
इक्क-दुए दे बिश्वासै बी, लगै कदे निं ठेस,
रंग-रंगीला गुलदस्ता ऐ, मेरा भारत देस।
ए न्याऽ दा आसन ऐ ते नीति दा भंडार,
सच्चा साथी मानवता दा, टोही लै संसार।
कपटी गी नेई बख्शै, बदलै मरजी जिन्ने भेस,
रंग-रंगीला गुलदस्ता ऐ, मेरा भारत देस।



भाई-चारा

हिंदू, बौद्ध, सिक्ख,
ईसाई ते मुसलमान।
नेकें रंगें दा गुंचा ऐ,
ए साढ़ा हिंदोस्तान।
मसाल बनेआ दुनिया तै,
साढ़ा ऐ भाई-चारा।
मंदर, कुतै मसीत,
कुतै ऐ गुरू-द्वारा।
तौरें-तरीकें अपने,
रूज्झे न सब इनसान।
बसनीक भारतै दे,
भारत दी ए संतान।
गुंपें ते गिरजा-घरें दी,
है अपनी गै शान।
नेकें रंगें दा गुंचा ऐ,
ए साढ़ा हिंदोस्तान।
रलियै मनांदे ईदां,
ते देयालियां न सारे।
गलतान मस्तिये इच,
लैदे न सब लुआरे।
खुशी-गमी च इक्क दी,
सारे न सांझ-दार।
उन्नती तै देसै दी,
सब्बै न दाबे दार।

मरना-मरोना देसै तै,
 ऐ अपना अभिमान।
 नेकें रंगें दा गुंचा ऐ,
 ए साढ़ा हिंदोस्तान।
 रस्मां-र'वाज,
 बोलियां न दिंदियां सरूर।
 भांदे निं बिंद दोखी गी,
 भन्नी दिंदे गरूर।
 इतिहास गवाही ऐ,
 निं फड़कै दना मलाल।
 बड़कें रक्खी संभाली,
 बरासत बड़ी कमाल।
 गीता-ग्रंथ आखदे,
 सो आखदा कुरान।
 नेकें रंगें दा गुंचा ऐ,
 ए साढ़ा हिंदोस्तान।
 दिनै दी चमक-धमक जियां,
 रंगें दा नखार।
 गुंचे च सज्जे फुल्ले दे,
 रंगें च गै बहार।
 बहु-भांतियां पंशाकां बी,
 बनांदियां समां।
 बहु-रंगिये सुआंद,
 जियें जीने दा गुमां।
 इक्कै लड़ी परोए,
 भारत दी ए संतान।
 नेकें रंगें दा गुंचा ऐ,
 ए साढ़ा हिंदोस्तान।



कौमी एकता

भरम-भाव मने निं कोई,
निर्मल जियां नीर।
नेकां धर्म न इत्थे भाएं,
लगदे इक्क शरीर।
नदियां-नाले नित्त बगांदे,
अमृत तुल्ले नीर।
उच्चे पर्वत पूजे जंदे,
मन्नी देव ते पीर।
बूहटे-रुक्ख पुजोंदे इत्थे,
सामर-तक ब्रह्मा।
कण-कण इस दा सुच्चा मोती,
बिंद क् नेई मलम्मा।
धरती साढी माऊ बरोबर,
ममता दी तस्वीर।
नेकां धर्म न इत्थे भाएं,
लगदे इक्क शरीर।
अटल पुजारी सच्चै दे ए,
कपट कुसै निं भाखा।
प्रभु नां दी माला जपना,
है बड्डी अभिलाशा।
मंदर-मस्जद, गुरुद्वारे,
तां पांदे न सम्मान।
मूरत राम रहीम दी ऐ,
इत्थे हर इंसान।

मनै सचाई, कोमलता,
 पर बैरी तै शमशीर,
 नेकां धर्म न इत्थै भाएं,
 लगदे इक्क शरीर।
 देआ-धर्म ते सेवा-भाव गै,
 भारत दा दस्तूर।
 भांत-सभांती बाशना ऐ,
 दिंदी अजब सरूर।
 जग-भंडारे रचे,
 कुतै ऐ छिंझै दी घंघोरा।
 कम्म सुआरन बखलै दे,
 लाई अपने जोर।
 दुक्ख पराए हरने दी ऐ,
 परंपरा गंभीर।
 नेकां धर्म न इत्थै भाएं,
 लगदे इक्क शरीर।
 तत्ती भुब्बल, लेतर, गीटे,
 ठंडे-ठंडे नीर।
 सारै दे संजोगै बनेआ,
 भारत इक्क शरीर।
 नेकै धर्मै दा संगम ऐ,
 मेरा प्यारा देस।
 मन-मरजी सब बिचरै करदे,
 कोई नि कष्ट कलेश।
 इक्क लड़ी परोए सब्बै,
 भावै दी जंजीर।
 नेकां धर्म न इत्थै भाएं,
 लगदे इक्क शरीर।



गणतंत्रता

गणतंत्रता दिवस, ऐ, साढ़े सुखनें दा प्रमान,
सारे देस-बासियें गी, इदे पर ऐ मान।
फरंगियें चलाए हे, मन-मानिये कनून,
जुल्मों-सितम जगाए, हिंदियें च हे जनून।
सागर जां ठां मारदा, लुकाई बिंबली,
फरंगियें दी बस्तिया, मची तां खलबली।
होआ महाल, अपनी बचाना जिंद-जान,
सारे देस-बासियें गी, इदे पर ऐ मान।
मनमानियें कमाए किन्ने कैहर तूफानी।
सुख-चैन लुट्टेआ तां, छाई ही बरानी।
फलबाड़ी खिड़दिया गी, जाबरें जुआड़ेआ,
छल कपट दी नीतियें उयां लताड़ेआ
जगह-जगह प् अज्ज बी न, जुल्में दे नशान,
सारे देस बासियें गी इदे पर ऐ मान।
फुलबाड़ी उज्जड़ी गी फी मुंडा सुआरेआ,
भौड़ें च फसी, बेड़ी अपनी गी तारेआ।
कंडे चुनी सुआरेआ, बत्तै गी अपनी,
न्हेंरे दी कंध ढाई, फी, हस्सी तां चाननी।
बड़ी गै शुभ घड़ी ही, जागे आत्म-सम्मान,
सारे देस-बासियें गी इदे पर ऐ मान।
जाबरें गी खिदिदयै, लेआ सुखा दा साह,
कुचालें इंदियें दा, खादा फी निं बसाह।

लिखेआ गेआ कनून तां, सरताज सरें दा,
 बनेआ ऐ स्हारा अज्ज ओ, बेकस, बेचारें दा।
 सब्बै न निश्ठा-बान तां, हिंदू जां मुसलमान,
 सारे देस-बासियें गी, इदे पर ऐ मान।
 सत्ता फरंगियें शा, भलेआं गोई खुसोई,
 अपने बिघानै राहें, फी लोकें च ही बंडोई।
 अज्ज दौर-दौरा देसै इच, तां लोक राजै दा,
 ए लोकराज बी ऐ फी अपने र'वाजै दा।
 प्रतीक ऐ सभ्यता दा, ते भारतै दी आन,
 सारे देस-बासियें गी, इदे पर ऐ मान।
 बरै-बरै मनोदा ऐ, ए पर्व सुहाना,
 सुर मलाई गांदे तां, सब्बै ए तराना।
 अस भारतै दे भारती, ए देस साढ़ा ऐ,
 आपूं आं अस बिधायक, बिधान साढ़ा ऐ।
 मुखडें प् सब्बनै दे बी, खिड़ी दी ऐ मुस्कान,
 सारे देस-बासियें गी, इदे पर ऐ मान।



धरती-मांऽ

अन-गिनत उपकार ऐ करदी,
किन्ने गिनां-गिनांऽ।
फ्हाड़-मदानी, नैहरी-बंजर,
धरती साढ़ी मांऽ।
शर-शर बगदे मिट्टे नाडू,
थन दुधारू तेरे।
डीकां लाई पीऐ दे,
सब धीयां-पुत्तर तेरे।
नाज-सब्जियां, फल रसीले,
तेरे गै परशाद।
समै-समै पर अर्पन करनीं,
ए तेरी मर्याद।
सौ मनीदां करदे फी बी,
के-किश गिनी सुनांऽ।
फ्हाड़-मदानी, नैहरी-बंजर,
धरती साढ़ी मांऽ।
पत्ते दी सूखम-जन सर-सर,
मिट्टड़ी लोरी तेरी।
घा-बूट कोमल-कोमल,
जां निग्घी गोदी तेरी।
झूमन-गान बिच्च मस्ती दै,
अम्मां तेरे जाये।

लोड़ां पूरे आप मुहारे,
 ममता इच भरमाए।
 किरतघान अस फी बी तेरे,
 घोखी औ शरमांऽ।
 फाड़-मदानी, नैहरी-बंजर,
 धरती साढ़ी मांऽ।
 लौहके-बड्डे, चंगे-मंदे,
 लक्खां रूप न तेरे।
 गोरे-काले, शैल-सुन्हाके,
 सबै अंग न तेरे।
 पालन-हारी सबने दी तूं,
 भेत मनै निं तेरे।
 जीवन-रक्षक जाये दी तूं,
 झल्ले दुक्ख बत्तेरे।
 तेरे गुणें दी खुशबूएं नै,
 मैहकै ए ज्हाऽन्।
 फाड़-मदानी, नैहरी-बंजर,
 धरती साढ़ी मांऽ।
 समे-समे पर लोड़ां पूरे,
 तूं ए जानी-जान।
 तेरे माल-खजाने सारे,
 जाये पर कुर्बान्।
 धुप्पा तेरी जिंद तपी जा,
 पाले ठंडी-ठार।
 तूं जाये दी खातर झल्ले,
 दुखड़े लक्ख-हजार।
 संज-सवेरै मैहमा गांदे,
 माहनू-डंगर, चिड़ियां कांऽ।

प्हाड़-मदानी, नैहरी-बंजर,
 धरती साढ़ी मांऽ।
 मन परचावें तै खिड़ाए,
 थां-थां फुल्ल रंगीले।
 बदल कोई निं जिंदा,
 माहनू कीते लक्खां हीले।
 रंग सुन्हाके, मोहक सुगंध,
 फी भौरें दे राग।
 जननी, गुरू ते बैद स्यानी,
 तूं सब दी सरताज।
 मेरी जिंद-जान ऐ तेरी,
 तेरे पर कुर्बान्।
 प्हाड़-मदानी, नैहरी-बंजर,
 धरती साढ़ी मांऽ।
 हर कोई अपनी समर्था पर,
 नेकां काज सुआरा दा।
 तेरी रक्षा खातर कोई,
 अपना तन-मन बारा दा।
 रुज्झे करमें दी खेढै इच,
 तेरे अंग न सारे।
 तेरा संग नभाऽ करदे न,
 सूरज, चन्न ते तारे।
 तेरी सांभ-संभाल गै,
 सगोसारी दा बरदान।
 प्हाड़-मदानी, नैहरी-बंजर,
 धरती साढ़ी मांऽ।



चन्न-तारे ते प्रेमी

सबनें सराहे, सदा चन्न-तारे,
न दुग्गे जां मित्ती दे, सारे दे सारे।
चन्नै नै, प्रेमी दे मुखड़े दी तुलना,
राती दा न्हेरा, जां जुल्फे दा खु'लना।
सरदा निं मिट्टी नै, फुल्ले दा तोल,
प्रेमी नै जचदा निं बिसला मखौल।
टंगे जां किल्लिये, लै दे लुआरे,
न दुग्गे जां मिट्टी दे, सारे दे सारे।
गोरा-गोल मुखड़ा ते काले जे नैन,
लुट्टै दे, हिरखी मने दा तां चैन
दिने-राती कु'रदा ऐ, पाई तां बैन,
कुसै भूत पेले, नां चमकी दी डैन।
ए रूपै दे जादूं दी ठंडू दे डोर,
न दुग्गे जां मित्ती दे, सारे दे सारे।
बोलें च मिट्टेडें, जां जादूं भरे दा,
लगदा ऐ, प्यारै दा अमृत बरे दा।
टोरै ते टौहरै, नज़ाकत भरोई,
दिक्खी तां, प्रेमी गोआ ऐ बतोई।
निं बोले जुगें शा ओ, चकरे बी हारे,
न दुग्गे जां मित्ती दे, सारे दे सारे।
बोलन निं कून, नां अक्खी दे शारे,
टिके इक्क थाहरै, केई हुट्टे-हारे,

पोची कुसै नै, जां तस्वीर कोई,
दिक्खी जिस्सी, मानु गेआ बतोई।
निं तांग ऐ मनें इच, ना हौके-हुंकारे,
न दुग्गे जां मित्ती दे, सारे दे सारे।
सबनें सराहे, सदा चन्न-तारे,
न दुग्गे जां मित्ती दे, सारे दे सारे।



बदलोंदियां रुत्तां

बीती गे सोहे,
स्याले फी आए।
सदा पर बुझोंदा,
नमैं गै न आए।
सोहै ध्याड़े बर्हाए जां डारे,
होए बतेह-जन; जिया-जैत सारे।
बे-चारे सारे, होए डौर-भौरै,
धलोफै दे नीर ते रुक्खें दे छौरै।
बीते स्याले तां फी जाद आए,
सदा पर बुझोंदा नमैं गै न आए।
स्यालै कदे फी तां पाया कपत्त,
ठंडू-ठरी गे, जिया-जैत अत्त।
कुसै अगग तप्पी ते गुद्दड़ पलेटे,
“मुक्कै कुतै नरक” नेटे बी कीते।
स्यालै बी चाहणू न रज्जी-रजाए,
सदा पर बुझोंदा नमैं गै न आए।
आई बसंत फिरी सुरत सारै,
मुस्कान परती ठरी दी नुहारै।
मुडी आए हासे जो पतझड़ हे लुटे,
फुल्ल-गुत्थडू टाहली-टाहली जां फुटे।
नजरें बी रंगी नजारे सराहे,
सदा पर बुझोंदा, नमैं गै न आए।
बीती गे सोहे स्याले फी आए,
सदा पर बुझोंदा नमैं गै न आए।

बहार-शंगार

झूमदी जां मस्तिया च, कोई मटेआर,
सोलां शंगार कीते अज्ज, आई ऐ बहार।
दब्बडें-दराडें इच, खिल्लरी गे रंग,
चैहकियां जुआन्नियां, जुआन्निये दे संग।
मस्तिया च खा दा मरोडे अंग-अंग,
सैनतां कुतै, ते कुतै मरजिया दी खंध।
भौरें संग कलिये बी न छेडे मल्हार,
सोलां शंगार कीते अज्ज आई ऐ बहार।
खिल्लरी ऐ चित्त-चोर, चीकनी सुगंध,
मन ठाठां मारदे जां मस्तिया च गंग।
मने च भरी कलिये तै, प्यारे दी सगात,
सज्जी-धज्जी चढ़ी आई, भौरें दी बरात।
जागीं पे पराने कुतै, सुत्ते दे प्यार,
सोलां शंगार कीते अज्ज आई ऐ बहार।
पाया जनम नमां, जां तरीडें सुक्किये,
मनै गी बी बझालेआ ऐ, तांहगें सुत्तिये।
डाहली-डाहली, सुआ-सुआ, गुत्थ फुट्टेआ,
कोमल शलैपे लोभी मन लुट्टेआ।
रजदा निं दिक्खी-दिक्खी, कली दा शंगार,
सोलां शंगार कीते अज्ज आई ऐ बहार।
टांबें-ढीगरें पू बी आइयां जुआन्नियां,
झुल्ली-झुल्ली गा दे प्यारे दी कहानियां।

खिड़े कुतै न मोतिये ते हस्सै दे गुलाब,
रज्जियै भरै दे न शबाबै च शबाब।
सज्जियां जुआड़ां, जियां अंगन-पसार,
सोलां शंगार कीते, अज्ज आई ऐ बहार।
झूमदी जां मस्तिया च कोई मटेआर,
सोलां शंगार कीते अज्ज, आई ऐ बहार।



बसंत

चिरें भाएं आई प् आई गै आई,
रंगें-सुगंधें दी भरमार आई।
चिरै शा हीखी मनै जेदी बस्सी,
चेतें जो हर दम धस्सी गै धस्सी।
सतरंगे सालूं दा झुंड ओ गुहाड़ी,
झकदे-झकदे प् हस्सी गै हस्सी।
दुनिया प् गोआ जादूं जां छाई,
रंगें-सुगंधें दी भरमार आई।
हिरखी मनै दी हीखी तां पूरी,
नेडै जां पुज्जी हिरखै दी दूरी।
ध्कोआ चैन नैन ते जिंदू सखाल,
आई रुत बांदी तां गोआ स्याल।
पालें दी कोई सुनै निं दुहाई,
रंगें-सुगंधें दी भरमार आई।
रुक्खें प् बी अज्ज जुआनी ऐ आई,
सुरें सुर मलांदे न सर-सर सराई।
नेकें रंगें दे न फुल्लडू खिड़ी पे,
जिंदे नै माहनू दे नैन भिड़ी गो।
गा दा कोई गीत, तां भाख लाई,
रंगें-सुगंधें दी भरमार आई।
बड़े गै रसीले ए फगन ते चेतार,
मस्ती च झुलदे न धनवान खेतार।

भौरै दे सहगां चलै दे निरंतर,
 पंडुत जां कोई उचारा दे मंतर।
 लगदा हर शै प् मस्ती ऐ छाई,
 रंगै-सुगंधे दी भरमार आई।
 सिधेरै दे सुंगड़े शरीरै गी जीब,
 अनुभव करै दे अजीब-ओ-गरीब।
 रुत ऐ बसंती बड़ी बे-मसाल,
 मनै दे गुहाड़ै ऐ गुज्जे छपाल।
 बुढ़ापे प बी अज्ज जुआन्नी ऐ आई,
 रंगै-सुगंधे दी भरमार आई।
 नर-नारिये, थां-थां मैहफल जमाई,
 सुहे-पीले लाब्बे भरै दे सुआई।
 गाऽ दे न पैछी बी नगमे सुहाने,
 छलके तां हिरखी मनै दे पैमाने।
 रितुएं दी रानी बसंत ऐ खुआई,
 रंगै-सुगंधे दी भरमार आई।



सौन

ए बहारां, फिरदियां-घिरदियां,
पर सोहे दी चलदी, लूह मंदी।
दिन कट्टना, औखा होई जंदा,
जीबें शा, सैहन नेई हुंदी।
इक्क जुल्ली, दिक्खी गासा इच,
सब नच्ची-नच्ची पौन।

आया सौन।
बेहियै ब्हाऊ दे डोले इच,
फिरदे मद-मस्त ए हाथी-जन।
कदे गासा इच कदे धारें पर,
फिर हुट्टे-हारे राही-जन।
उच्चियें मुटयार धारें दै,
ए गलें लग्गी-लग्गी बौहन।

आया सौन।
लांदे कुदाड़े गासा इच,
काले-चिट्टे ए लेले-जन।
खुशियें इच अत्त पसोए दे,
रूआं दे नरम गदेले-जन।
तरेहाई दी धरती खातर,
ए गड़-गड़ करदे पौन।
आया सौन।

बद्धल जां, टप-टप-टप ब'रदे,
धरती दी तपश मटांदे न।
निग्घी गोदी सुत्ते दे,
जीबे दे प्राण जगांदे न।
केई जीब अन-गिनत नुहारें आलें,
नजरी लगदे औन।

आया सौन।
नंगी धरती गी खट्टने तै,
बीऽ औकर बनियै छांदे न।
धुप्पा झुलसोए शरीरै गी,
रूआं दा फाहेआ लांदे न।
सजदे करदे जननी गी,
जद चलदी मतवाली पौन।
आया सौन।

जदूं पैहली छल्ली पौदी ऐ,
खुशिये दी बाड़ जन औदी ऐ।
तापै नै मांदे जीबे दी,
बिन कीते कारी हुंदी ऐ।
पुच्छ गल्ल निं नाडू-नदिये दी,
जड़े-उच्छली-उच्छली पौन।
आया सौन।

के दसचै बरकत सौनै दी,
हर थां प् सब्जा छाई जंदा।
रक्कड़ शा रक्कड़ थाहरें पर,
इक मखमली सेज बछाई जंदा।
ए मिश्टी नमी रचांदा ऐ,
सुखदाई इस दा औन।

आया सौन।
ए सौन प्यारा सबने दा,
ए सबने मन भांदा ऐ।
प्यार-भरोचे मने इच,
मिलने दी तांहग जगांदा ऐ।
मिट्टिडियां जद ब'रन फुहारां,
फ्हाडें ठंडां पौन।
आया सौन।



सब्ज क्रांती

सुखने होए सकार, आई क्रांति सब्ज महान,
निश्चैता अज्ज रस्सै-बस्सै, देसा दा करसान।
गे-गुआचे दिन, ही कीती दादें नै करसानी,
बदले पिछले तौर-तरीके, बदली हल्ल परानी।
पुचकारें दे थाहर, खेतरें घूं-घूं करन ट्रैक्टर,
तनियै बैठा हाली, सच्च बुझोंदा फिल्मी ऐक्टर।
हर दम नच्चै मुखड़े पर, इक्क निम्मी मुस्कान,
निश्चैता अज्ज रस्सै-बस्सै, देसा दा करसान।
मारू कंठी ऐंधड़ बनी, बुड्डे आई जुआन्नी,
लैह-लैह करदे खेतर झुलदे, शर-शर बगदा पानी।
भाग सराहन खड्ड-दराकड़ां, खुशियें इच भरमाइयां,
सैहमी जंदियां कदें फी सिमरी, भखदियां मिरग-सलाइयां।
सुनसानी दे हौके भुल्ले, गीत खुशी दे गान,
निश्चैता अज्ज रस्सै-बस्सै, देसा दा करसान।
संग मशीने होआ दी अज्ज, बाहडी, बाही-गाही,
होए परेडे दिन मंदड़े, ब्हार खुशी दी आई।
भांत-सभांते हैलें, खेतर नाजें गे लदोई,
निश्चैते अज्ज, देस अपने पैरें गेआ खडोई।
पर रुके निं, अज्ज बी चलदे पंज-साला प्लान,
निश्चैता अज्ज रस्सै-बस्सै, देसा दा करसान।
हरयाली गै हरयाली, अज्ज छाई चार-चबकखे,
सौनै दी संग, जेठ-हाड़ तां रलियै गुड़के-हस्से।

फसलें नै भरपूरे खेतर, छेड़ै दे संगीत,
 देई औगली कन्नै, गा कोई, लम्मी-भाखें गीत।
 साईसी ढंग-तरीकें, कीता हर कम्म अज्ज असान,
 निश्चैता अज्ज रस्सै-बस्सै, देसा दा करसान।
 बरें-परेड्डें दिक्खे सुखने, होए अज्ज सकार,
 लम्मा पैडा गेआ नपोई, खुशहाली घर-बाहर।
 मक्क-बाजरा, अलसी-तिल, कनक, सब्जियां, धान,
 दुद्ध-घ्यो दा देसै इच, आया कोई तूफान।
 रज्जा-पुज्जा हर माहनू, द्विद निश्चै दा प्रमान,
 निश्चैता अज्ज रस्सै-बस्सै, देसा दा करसान।
 नैहरां-कूहलां, खूह-तलाऽ ते बन्नै दी भरमार,
 पूरै दे बी लोड़ां-थोड़ां, नेकां जल-भंडार।
 इक्क-दौ निं, छे-छे फसलां बड्डै दा करसान,
 अज्ज बरहैलां नेई बगदियां, बगदे न खलयान।
 गल्ल निं सुनचै थोड़ै दी, बाद्धे दा नित्त बखान,
 निश्चैता अज्ज रस्सै-बस्सै, देसा दा करसान।



पत-झड़ ते बसंत

बीती रुत स्याले दी,
आई बसंत-बहार।
खिड़-खिड़ हस्सै कामनी,
मतवाली मटेआर।
निर्दयी पत-झड़ नै हा,
किन्ना जुल्म कमाया।
मस्त-झूलदे रुक्खें गी हा,
बस्त्र-हीन बनाया।
नंगे-मुंगे पालें ठरदे,
सैहमें गल्ल निं करदे।
बरखें-झड़ियें सबर गुआया,
सी-सी, हा-हा करदे।
पैहने बस्त्र, गुत्थ-रेशमी,
फुल्लें दा शंगार।
खिड़-खिड़ हस्सै कामनी,
मतवाली मटेआर।
रुआरें-पारें, उच्चियें धारें,
बर्फू दे चिटकोले।
चिट्टे चिन्नह चमकदे,
जां चिट्टे भौने दे खोले।
किला त्रुट्टा अंत होआ,
ए जुल्मा दा परिणाम।

हुन जालम, मजलूम,
 मजलूमै दे जागे प्राण।
 सज्जे-धज्जे झुलदे रुक्ख,
 जां जान्नी दे जनिहार।
 खिड़-खिड़ हस्सै कामनी,
 मतवाली मटेआर।
 कलिये झुंड गुहाड़े,
 हस्सी हर पासे प्रभात।
 ब्हा पुरे दी लेई सनेहा,
 पुज्जी भौरें पास।
 स्वयंबर दा मंडप सज्जा,
 सुखने होए सकार।
 जुड़ियै बैठे पैछी बी तां,
 करने तै सत्कार।
 चार-चबक्खै कुदरत कीते,
 अज्ज सोलां शंगार।
 खिड़-खिड़ हस्सै कामनी,
 मतवाली मटेआर।
 हर पासै अज्ज, रंग-बरंगी कलिये दी भरमार।
 रूण-झुण रौणक लाई दी,
 भौरें दी गुंजार।
 ए रसिए न बड़े गतार,
 खुंझदे निं सुरताल।
 इस तालै पर नच्चन कलियां,
 ठुमक-ठुमक दी चाल।
 काहन्ना, संग गोपिएं नच्चै,
 कोयल गा मल्हार।

खिड़-खिड़ हस्सै कामनी,
मतवाली मटेआर।
रंग-बरंगे फुल्ले,
धरती दा सुरूप सजाया।
चुप्प-चपीते अंबर,
तारे इच घरमोल मचाया।
खिने-पले इच चूर होआ तां,
सारा गै अभिमान।
फट्टी नजरें दिक्खै करदे,
ओ धरती दी शान।
पागल भौरें सांई, मुंडरांदे,
तारे सह-परिवार।
खिड़-खिड़ हस्सै कामनी,
मतवाली मटेआर।



लुटेरे

लुट्टै दे सारे, लुटेरे न सारे,
अपने सरगों दे, हेरी न सारे।
लुट्टै दा कोई, समां ऐ कुसै दा,
लुट्टै दा हेरी, गुमां फी कुसै दा।
मोड़ी मनै दियां, तुंदें मुहारां,
मचांदे खलबली, ऐ सुरती दे हारे।
लुट्टै दे सारे, लुटेरे न सारे,
अपने सरगों दे, हेरी न सारे।
चन्नै बी लुट्टी तां, राती दी शान,
दड़ी गई गुट्टें, होई निम्मो-झान।
छप्पी गे, लज्जा दे मारे बी तारे,
बे-बस लाचार, सारे दे सारे।
लुट्टै दे सारे, लुटेरे न सारें,
अपने सरगों दे, हेरी न सारे।
आसें हीखिये इच, गलतान सारे,
लड़कै दे, सूली तमें दी बे-दारे।
जीयै-मरै कोई, इनै बास्ता निं,
सरगगा सै पूरै, तां बारे-न्यारे।
लुट्टै दे सारे, लुटेरे न सारे,
अपने सरगों दे, हेरी न सारे।
सरांहदे सदा ओ तां न्हेरें गी सारे,
लोई शा छप्पी जिनें दिन गुजारे।

न्हरे च भाएं प् सुझदी निं बत्त,
 ठगै दे आपूं गी, देई तां लारे।
 लुट्टै दे सारे, लुटेरे न सारे,
 अपने सरगो दे हेरी न सारे।
 मेटै दे नेकी गी, नेकी जताई,
 लुट्टै दे, लोटी दी दिंदे दुहाई,
 बौहदे बनी आपूं, अक्खी दे तारे,
 लाचार, बे-बस होई गे बेचारे।
 लुट्टै दे सारे, लुटेरे न सारे,
 अपने सरगो दे, हेरी न सारे।



रंग ते सुगंध

मोसम आया ब्हारा दा,
रंग-सुगंध खलारा दा।
चार-चबकखै नजरी औदी,
हरयाली गै हरयाली।
भांत-सुभांते फुल्ले भारे,
निफी ऐ डाहली-डाहली।
सुकका टुंड बी रीसो-रीसा,
अपना आप शंगारा दा।
मोसम आया ब्हारा दा,
रंग-सुगंध खलारा दा।
खौरै सुत्ते जागी पे,
जीब न लक्खां-ज्हारां।
सैल्ले लाब्बे सज्जी गेइयां,
उच्चियां-नीमियां धारां।
खिनें-पले इच जादूं चलेआ,
ओदा, चतर-चनारा दा।
मोसम आया ब्हारा दा,
रंग-सुगंध खलारा दा।
गीत सुहाने गा करदे,
अज्ज पैछी रंग-रंगीले।
कलिये पर मंडरा करदे,
भौरे बी हौले-हौले।

जुगें-जुगें शा लगा मंदा,
 लगदा अज्ज तुआरा दा।
 मोसम आया ब्हारा दा,
 रंग-सुगंध खलारा दा।
 नर-नारी के बच्चे-बुड्ढे,
 रंगे होली खेढे दे।
 जो कोई जानू-पंछानू,
 जानी-जानी रेहडै दे।
 जादू रत्त जगाऽ करदी,
 जां हासा कुसै मटेआरा दा।
 मोसम आया ब्हारा दा।
 रंग-सुगंध खलारा दा।
 निकड़े-निकड़े नाडू बी,
 मिट्टड़े संगीत बजाऽ करदे।
 फुल्लडुएं दी शोभा दिक्खी,
 ठैहरी-ठैहरी जा करदे।
 लब्धा कोई खजाना जां,
 'ओदा' सच्ची सरकारा दा।
 मोसम आया ब्हारा दा,
 रंग-सुगंध खलारा दा।
 धरती माता खोहले जां,
 रंग-सुगंधें दी भंडार।
 कलियां, फुल्ल, गुत्थडू सैल्ले,
 फुट्टी पे तां बे-शमार।
 मांदे, हुट्टे-हारें तै,
 जीने दे बत्त सुआरा दा।
 मोसम आया बहारा दा,
 रंग-सुगंध खलारा दा।
 सिंबलू तनी-तनोई,

अपनी पगगै फुल्ल सजा करदा।
 बनफशा भुंआं दे सीनै,
 लगगी मन रिझाऽ करदा।
 पंज-फुल्ली बी करै कसीदा,
 सालूं सद्धर-प्यारा दा।
 मोसम आया ब्हारा दा,
 रंग सुगंध खलारा दा।
 हांबी-हांबी रात की रानी,
 करै सुआगत ब्हारा दा।
 ग'रना खुशबूएं दा राजा,
 मोहक सुगंध डुआरा दा।
 किंब-जम्हीरी, अंब-आरनी,
 मौका हार-शंगारा दा।
 मोसम आया ब्हारा दा,
 रंग-सुगंध खलारा दा।



गीत


अस दौ भाएं, इक्क जिंद-जान गोरिये,
कैस्सी जनमें दी भुल्ली पनछान गोरिये।
सूहे ओठे प् करार,
हासे मिट्टड़ी फुहार।
अस तेरे पर होए कुर्बान गोरिये,
कैस्सी जनमें दी भुल्ली पनछान गोरिये।
काले नैने च सरूर,
गोरी ग'ल्लें प् गरूर।
मारी सुट्टेआ ऐ तेरी मुस्कान गोरिये,
कैस्सी जनमें दी भुल्ली पनछान गोरिये,
इक्क टोर शरमीली,
दुए ढौर बी नशीली।
साढ़ा मन बैरी होआ बेईमान गोरिये,
कैस्सी जनमें दी भुल्ली पनछान गोरिये।
हस्सी नैन हे मलाए,
जान्ने, फी की चराए।
आस्सें हीखियें गी कीता निम्मोझान गोरिये,
कैस्सी जनमें दी भुल्ली पनछान गोरिये।
अस दौ भाएं, इक्क जिंद-जान गोरिये,
कैस्सी जनमें दी भुल्ली पनछान गोरिये।



गीत

म्हीना चेत्रा दा आया,
समां धरती प् छाया।
बे तूं आई मिली जायां सज्जना,
मेरा चित्त भरमाया।
आइयां बांदियां न ब्हारां,
सज्जी-संवारियां धारां।
गीत गांदे न पखेरू,
हस्सी पेइयां गुलजारां।
ठंडी ब्हारू दे फणाकें,
दुखी मना गी सताया।
बे तूं आई मिली जायां सज्जना,
मेरा चित्त भरमाया।
खिडे फुल्ल डाहली-डाहली,
बत्त भुल्ली गेआ माली।
लोभी, रूपै दे, भौरें,
तांघां दित्तियां बझाली।
रुक्खें कीता ऐ शंगार,
हाड़ बाशना दा आया।
बे तूं आई मिली जायां सज्जना,
मेरा चित्त भरमाया।
हृद सबरै दी खुट्टी,
लगै हर गल्ल खुट्टी।

मनै छाई तां दुआसी,
असे सुध बी गुआची।
बैरी ऊधम मचाया,
डोली-डोली गई काया।
बे तूं आई मिली जायां सज्जना,
मेरा चित्त भरमाया।
म्हीना चेत्रा दा आया,
समां धरती प् छाया।
बे तूं आई मिली जायां सज्जना,
मेरा चित्त भरमाया।



गीत

ओठें पर नच्ची पे, नि'म्मे-नि'म्मे हासे,
जोबनै दे खिड़ी पे, फुल्लडू सुन्हाके।
बाशना ऐ भौरें इच पाया घरमोल,
पेई तां चफेरै गई, इक्क परचोल।
जुल्फें नै खेढदे, ब्हाऊ दे फणाके,
जोबनै दे खिड़ी पे फुल्लडू सुन्हाके।
मिलियां जां मनै नै, मनै दियां सारां,
बज्जे संगीत कुतै, हल्लियां न तारां।
डु'ल्ली-डु'ल्ली पौदे न, हास्से ते गड़ाके,
जोबनै दे खिड़ी पे, फुल्लडू सुन्हाके।
आसें पलंबोई मन, उडुरा दा गासें,
सद्धरां कुआरियां दिादियां दलासे।
गाई-गाई हुटदे निं बंगें दे छणाके,
जोबनै दे खिड़ी पे, फुल्लडू सुन्हाके।
ओठें पर नच्ची पे, नि'म्मे-नि'म्मे हासे,
जोबनै दे खिड़ी पे, फुल्लडू सुन्हाके।



कुंडलियां

परदेस जाई बी रक्खेओ, चेता कौल-करार,
लग्गी र'वां निं हीखिया, पायो चिट्ठी-तार।
पायो चिट्ठी-तार, खुआंदी अद्ध-मलाटी,
सच्च बुझोदा, आपूं तुसें ऐ पाई फराटी।
चप्पा क् कागद, पर कट्टै सौ कलेश,
चिट्ठी दा निं भुल्लेओ, जाई परदेस।
बीते ब'रै करोड़ां, इस छूह-छपाई,
दिन निरंतर भड़केआ, रात हत्थ निं आई।
रात हत्थ निं आई, बजोगी चढ़ेआ ताप,
भोगै दा खौरै, केहड़े जनमें दे पाप।
रात बजोगन हौके भरदी, नेटे सौ-सौ कीते,
मिलना भागै नेई, प् ब'रै करोड़ां बीते।
माया चित्त माहनू दा, पलै च लै भरमाई,
जियां कोई जादूंगिरनी, जादूं जा चलाई।
जादूं जा चलाई, फी नजरी कक्ख निं औदा,
सच्चै गी ओ झूठ मिथै, झूठै गी भांदा।
नेकें, रूप-छलावें, इक्क जाल बछाया,
नजर चफेरै आवै, बस माया गै माया।
टिक-टिक, टिक-टिक करै घड़ी, समां बीतदा जा,
हिरदे दी हर धड़कन, सुर-तालै नै गा।
सुरतालै ने गा, जे जीवन ढलदा जा दा,
मंजल कोल आवा दी, पैडा घटदा जा दा।

बेल्ला हत्थ निं औना, मनै दी करी लै हर-इक,
 इयै गल्ल सुझादी, घड़ी बी करियै टिक-टिक
 कीते सौ-सौ नेटड़े, नूह आवै तौली,
 गोरा रंग, सुन्हाकड़ी, फब्बै निं सौली।
 आशा पूरी, थोआ किश दिन चैन मनै गी,
 नूह आखै शा बाहर, सस्स निं भा दना बी।
 पुच्छो, कियां उमरी दे बाकी दिन बीते,
 पूर्व-पच्छम मिले निं, जतन बहेरे कीते।
 रक्सम-त्रीमत दौ पेहिये, ते जीवन गड्डी,
 बाल-ज्याणे सुआरियां, ए रिद्धदी लद्धी।
 रिद्धदी लद्धी र'वै दी, स्हाबी जे भार,
 बे-स्हाबा जे लद्धेआ, फसी बशकार।
 औखा पैडा नापना, हुन बनी मसीबत,
 सिमरन पिछले निंबलै गी खसम-त्रीमत।
 भरी जुआन्नी छलकदी, हाड़ा दा पानी,
 आड़ी-बन्ने रोढ़दा, ए जोश तुफानी।
 जोश तुफानी जागेआ, मचलै दिन रात,
 बिन खंघू दे खंघदी, बिन मतलब बात।
 थाहरो-थाहर धलोफदी, तुप्पै दिल-जानी,
 झक्क-शरम निं रक्खै, बिंद क् भरी जुआन्नी।
 गुड़-गुड़, गुड़-गुड़, गुड़कदी, रंगीली झारी,
 हर दम ओठें लग्गी दी, प्रीतम दी प्यारी।
 प्रीतम दी प्यारी, ए सदा संग-संग रौहदी,
 भरी सभा, नि-झक्की जाई खब्बै बौहदी।
 'अकदे बी निं तुस', त्रीमत करदी बुड़-बुड़,
 गल्ल करो कोई हिरखै दी, छोड़ो हुन गुड़-गुड़।

पा-तोपा नीर संजोई, नाडू बनेआ,
 कोई निक्का, कोई बड्डा, जाला जन तनेआ।
 जाला जन तनेआ, तां छिड़े मिट्टे मल्हार,
 शर-शर, शर-शर उब्भरै, दोद्धी फुहार।
 नाडू नदी, सागर, के-के बनेआ तोपा,
 गासा बदल विशाल, मूल उयै इक तोपा।
 बीती रुत स्याले दी, छाई तां ब्हार,
 नार करै जियां कोई, सोलां शंगार।
 करै सोलां शंगार, चलै मटकी मस्तानी,
 सबने दा मन मोहै, भखदी भरी-जुआन्नी।
 लोभी भौरै लाई लेई, कलिये संग प्रीती,
 करै दे ए गुंजार, ब्हार स्यालू बीती।
 फेर समे दा किश, किश भागें दी गल्ल,
 अज्ज जेहड़ा ऐ अज्ज, कल खोआया कल।
 सुनदे कल-कल, बीती गेई आयु सारी,
 आया नि पर कल, हारे सबै नर-नारी।
 अज्ज कर जो करना, बिंद नि करेआं देर,
 इस्सै नै बज्जे, तेरे भागें दे फेर।
 बिल्ली बोली म्याऊं, जां कुक्कड़ नजरी आया,
 कन्ने पेई बलेल, तां कुक्कड़ बी करलाया।
 करलाया कुक्कड़ तां, कुड़-कुड़, कूं-कुड़-कुड़,
 थर-थर कंबै जिंद, कालजा करदा धुड़-धुड़।
 भुल्ली सुरत डरै नै, गेइयां लत्तां, हिल्ली,
 पिच्छें टुरै शकार, ते अगें-अगें बिल्ली।



न्होरा


जिन्ना सांभी-सांभी, असें पैर धरेआ,
कंडे इन्ना गै, असें गी सताया।
न्हैरे ते झक्खड़ हे साढ़े गै भागें,
अगें बदे, धिक्की पिच्छें पुजाया।
रगड़ेआ बी मत्था, हर साह् दी चाला,
न्यांऽ निं होआ, बे-न्यांऽ शा कसैला।
झपकनी प् अक्ख, असें बी कदे निं,
भाएं ताड़ै लग्गी दी, पत्थर बनी जा।
ए साहें दा तांता, सदा तै रुकी जा,
शरीरै दा बंधन बी, भाएं त्रुट्टी जा।




झगड़ा

दिनें-दपैहरी जां राती फी, जेल्लै कश निं कोई,
मन-बुद्धी दियां गल्लां सुनचन, कन्नै सुनी लै कोई।
मन बुद्धी गी आखै, अड़िये छोड़ व्यर्था पीहना,
आप मुहारे टुरदे रौहना, ए बी ऐ कोई जीना।
जुग बीती गे तुई समझांदे, कदे ते मन्नी हुंदी,
दुनिया दे इक्, किन्नी तेरी, मान-बढ़ाई हुंदी।
जिदद् अति दी करनी, तां गै नीम-सुदाई होई,
मन-बुद्धि दियां गल्लां सुनचन कन्नै सुनी लै कोई।
कच्ची खो ऐ अड़ेआ तेरी, दुनिया भंडै तुई,
किल्ले दिक्खी दुक्की बौहना, झक्क शरम निं कोई।
झूठे सुखने दस्सें छलिया, निकलै सच्च निं कोई,
मन्नी गल्ल जदूं बी तेरी, तदूं गै हानी होई।
आप-मुहारे टुरना दे, नेई गल्ल गलायां कोई,
मन-बुद्धी दियां गल्लां सुनचन, कन्नै सुनी लै कोई।
दिनें-दपैहरी जां राती फी, जैल्लै कश निं कोई,
मन-बुद्धी दियां गल्लां सुनचन, कन्नै सनी लै कोई।











पूरण चंद बड़गोत्रा

परिचय

- जन्म - 12 जनवरी 1937 ई०
- जन्म स्थान - भलवाल (तहसील ते ज़िला जम्मू) जे एण्ड के।
- शिक्षा - बी० ए० (आनर्ज)
- कम्म-काज - सेवा निवृत्त फंक्शनल मैनेजर इंजस्ट्रीज ऐंड कामर्स (जे० एण्ड के०)
- इसलै - प्रैजिडेंट विल्लैज बैल फेयर कमेटी, अप्पर, लोअर, भलवाल ते।
- मनोनीत चेयरमैन - पंचायती अदालत, अप्पर भलवाल, पंचायत, भलवाल जे० एण्ड के०, जम्मू।